

VASEGA LAITI AUIVI 2020

MANATU AOAQ : SAILI MUAMUA LE MALO O LE ATUA MA LANA AMIOTONU

IANUARI	VALAAUINA E GALULUE		
26	ASO SA TUPULAGA		
	Ua valaau le Atua ia Aperaamo	-----	Kenese 12: 1 - 9
FEPUARI	VALAAUINA E GALULUE		
2	O le malaga a Filipo	-----	Galuega 8:4-8, 26-40
9	Ua amata le galuega a Iesu	-----	Luka 4:14-22
16	O Tepora ma Parako	-----	Faamasino 4: 4 - 9
23	O le olo o Papelu	-----	Kenese 11:1 - 9
MATI	O LE ATUA E ALOFA		
1	O le fafine pologa ma lana tama	-----	Kenese 21:8-21
8	O le fafine Elenei	-----	Mareko 7:24-30
15	Ua sola Iakopo i Karana	-----	Kenese 27:41-45
22	Ua alofa pea Ruta ia Naomi	-----	Ruta 1:15-19
29	Saito ma le Titania	-----	Mataio 13:24-30
APERILA	FA'AMAONI		
5	(Aso Sa Laupama)		
	Ua amata puapuaga o le Mesia	-----	Mareko 11:1-10
12	(Aso Sa Toetu)		
	Tuugamau avanoa	-----	Mataio 28:1-10
19	Faifaiva o le Tala Lelei	-----	Mareko 1:11 - 18
26	Elisaia – o le auaua a le Atua	-----	11 Tupu 5:1-19
ME	TINA E OLA SAILI		
3	Ua fanau mai Mose	-----	Esoto 2:1-9
10	(Aso Sa Tinā)		
	O Mareta ma Maria	-----	Luka 10:38-42
17	FONO TELE		
24	O le augani a Patesepa	-----	1 Tupu:1: 15 - 31
31	Aso Sa Penetekoso		
	Ana le perofeta fafine	-----	Luka 2:36-38
IUNI	FA'AALIA O LE SILISILI ESE O LE ATUA		

7	O miti a Farao	-----	Kenese 41:17-41
14	O le loto tele o Ioane ma Peteru	-----	Galuega 4:1 - 22
21	Faaosoosoga Iona lua	-----	Luka 4:5-8
28	O le afi mai le Atua	-----	Numera 11:1-3
IULAI AGAMALŪ			
5	Ua agalelei Reuelu ia Mose	-----	Esoto 2:11-22
12	Faaosoosoga Iona tolu	-----	Luka 4:9 - 13
19	Ua salamō le Tupu o Aapo	-----	1Tupu 21:27 - 29
26	Taulaga a le fafine	-----	Mareko 12:41-44
AOKUSO TAMĀ OLA GALUE			
2	O Iuta le Sekara	-----	Mataio 26:14-16
9	(Aso Sa Tamā) Ua usitai Lota	-----	Kenese 19:21-25
16	Iona i le manava o le i'a	-----	Iona 1:12 – 2 :10
23	Ua faauuina Tavita ma Tupu	-----	2 Samuelu 2:1-4
30	O Sakaio	-----	Luka 19:1-10
SETEMA FANAU O LE TOFI			
6	(Aso Sa Tala Lelei) Ta'u atu e tina le Tala lelei	-----	Mataio 28:1-10
13	O Samasoni le tama mo le Atua	-----	Faamasino 13:24-25
20	O Iesu i le fale o Iona tamā	-----	Luka 2:41-52
27	Areto e lima ma i'a e lua lau	-----	Ioane 6:8-9
OKETOPA O FANAU O LE TOFI			
4	<i>Tapenaga Lotu Tamaiti</i>		
11	<i>Aso Sa Tamaiti</i>		
18	<i>Malologa Lotu Tamaiti</i>		
25	Ua faaolaina e Iesu le tagata oti	-----	Luka 7:11-17
NOVEMA FAAMOEMOE I LE ATUA			
1	O le miti a Iakopo	-----	Kenese 28:10-22
8	Ua pupuni e le Atua gutu o leona	-----	Tanielu 6:14-24
15	Ua faamalōlō le afafine o Iairo	-----	Mareko 5:21-24
22	O Ioane ma Peteru i luma o Alii sili	-----	Galuega 4:5-14
29	Ua fasiotia Naamanu	-----	Eseta 7:1-10
TESEMA: UA O'O MAI LE FAAOLATAGA			

6	Valoaga ole Mesia	-----	Isaia 9:6 - 7
13	O Iosefa ma le Agelu	-----	Mataio 2:20 - 23

MANATU AOAQ : SAILI MUAMUA LE MALO O LE ATUA MA LANA AMIOTONU

MANATU TAIALA O IANUARI & FEPUARI: VALAAUINA E GALULUE

Ua amatalia foi galuega o lenei tausaga faa-le-Aoga Aso Sa. O le uiga lea o tatou, tatou te galulue pea e tautua le finagalo o le Atua. Ua faatāua ai le ola galulue i lenei masina. E le gata o le amatalia o galuega faapea aoga a nai fanau. E leai se mea tatou te maua ma le filemu i le soifuaga nei, e tatou te galulue ma saili ona tatou maua lea o le ola manuia i le lumanai.

ASO SA: 26 Ianuari 2020 (Aso Sa Tupulaga)

MATAUPU: UA VALAAU LE ATUA IA APERAAMO

SINI: Ia malamalama le vasega, e manuia le tagata e faalogo ma usita'i e pei o Aperamo.

TUSI FAITAU: Kenese 12: 1 – 9

FESOASOANI MO FAIAOGA:

O le Kenese 17 fuaiupu 5, o iina faatoa suia ai le igoa Aperamo ia Aperamo. Ina ua fetalai le Atua o le a le toe valaauiina oe ia Aperamo ae o le a igoa oe ia Aperamo, o le uiga o le igoa Aperamo (o le tamā o le va o nuu). O le feagaiga na osia i le va o le Atua ma Aperamo o lana fanau e pei o le oneone o le sami e pei o fetu o le lagi o lona uiga o Aperamo o le tupuga o tagata uma o le lalolagi.

A o le manuia ua maua i lona faatuatua ma lona talitonu i lona Atua. E pei foi o lona usita'i i le faatonuga a le Atua ia te ia e tulai ma alu i le nuu o le a Ia faasino ia te ia e alu i ai. Fetalai le Atua ia tuua lou nuu, ma tagata o lou nuu, ma le aiga o lona tama ae alu.

E le faigofie lenei valaauiina, e alu i se nuu e na te le iloaina. Tuua le olaga sa masani ai, ae o le a alu i se siosiomaga fou, alu e toe tau atia'e. Ae peitai, e lei vaai Aperamo i ia itu, ae ua faamuamua ia te ia le usitai i le finagalo o le Atua ua valaauiina o ia. Na o Aperamo ma lona toalua o Sarai ma le atalii o lona uso o Lota, ua agai atu ma nofoia le laueleele ua finagalo i ai le Atua. Fai mai ua faalatele e le Atua le mea sa nofo ai Aperamo, ua ia atiae ua tupu lona tamaoiga o ana lafumanu ma ana oloa.

Ua faamanuia le Atua i lona faatuatua ua usita'i, o se a'oa'oga foi lea o lenei tala mo nai fanau. Ia faalogo ma usita'i i matua, o matua latou te aumaia faasinoga lelei e manuia ai. O le tamaitiiti usita'i ma faalogo o le tamaitiiti manuia lena. A usita'i i matua ua tatou faia lava le finagalo o le Atua e pei ona aumai i le tulafono e 5. "Ia e ava i lou tamā ma lou tinā, ina ia faalevaleva ai ou aso i le nuu o le a foa'iina mai e le Alii lou Atua ia te oe." (Esoto 20 f 12)

Tamaiti, ua valaauina i tatou e le Atua ina ia tatou omai i le aoga Aso Sa e faalogologo i tala o lana Afioga Paia e fafagaina ai lo tatou ola faale-Agaga.

E le na o tagata matutua e valaauina e le Atua, e valaau mai foi le Atua ia i tatou le fanau. Toaga e tatalo o iina e faailoa mai ai e le Atua lona finagalo e ao ina tatou savavali ai. So o se mea lelei lava ua e mafaufau e fai o le Agaga lena o le Atua e musumusu atu ia te oe, ae a e faia mea leaga ua e le faalogo ma e le fia usita'i o lona uiga o le tiapolo na e musumusu atu e taumafai e faaleaga o tatou olaga.

GALUEGA FAATINO: PASO

F	G	A	P	F	S	L	N
A	L	R	F	R	A	E	L
A	P	E	R	A	A	M	O
L	O	S	A	T	G	P	T
O	N	S	E	U	S	L	A
G	E	E	S	A	R	A	I
O	V	S	T	T	A	R	K
F	H	A	N	U	N	L	I
U	S	I	T	A	I	V	L

(1) APERAAMO

(2) FAALOGO

(3) FAATUATUA

(4) SARAI

(5) USITAI

(6) LOTA

PESE: Aperaamo tama ma lana fanau (Father Abraham and his sons)

A'OA'OGA:

1. Faalogo ma usita'i i matua.
2. Ua valaau mai le Atua ia i tatou
3. E faamaoni mai le Atua ia i tatou.

UA VALAAU LE ATUA IA APERAAMO:



ASO SA: 2 Fepuari 2020

MATAUPU: O LE MALAGA A FILIPO

SINI: Ia malamalama le vasega na valaauina o Filipino, e talai ma folafola le Tala Lelei a Iesu.

TUSI FAITAU: Galuega 8: 4 – 8, 26 – 40

FESOASOANI MO FAIAOGA:

O Filipino o se tasi leni o tiakono mai tiakono e toa 7, sa manatu le au uso e toasefulu ma le toalua e filifilia nisi se toa 7 e fesoasoani ia i latou i le faasalalauina o le Tala Lelei ia Iesu Keriso. Ina ua Afio a'e Iesu i le lagi ona auina ifo lea o le Agaga Paia e tautoalua le au Aposetolo i le uluai Ekalesia. O le famoemoe o le tofia o tiakono, e fesoaoasni mo le lufilufiina o oloa ma tauamafa. Peitai, ua le gata ai iina le latou galuega, ua oo i le faasalalauina o le Tala Lelei e ala i le laugaina o le Afioga Paia a le Atua. Fai mai ua o solo e na faasalalauina ma latou folafola atu le Tala Lelei o le upu ona alu lea o Filipino i Samaria. Sa matuā naunau tagata e faalogologo i upu na fai atu ai Filipino.

Ua latou faalogologo ma vaavaai i faailoga ua faia e Filipino, ua faamalōlō i ma'i, ua tuli i fafo agaga leaga i tagata e toatele sa i ai. Ua alalaga ma le leo tetele e sa maua i ma'i supa ma pipili. **Ua alalaga fiafia nei tagata ina ua faamaloloina i latou.**

O le vaega lona lua o le tala. Ua fai mai le agelu ia Filipino. Ina tu ia, ina alu i le itu i toga, o le ala e alu ifo mai Ierusalem i Kasa o le mea ua tuufua lea. Faauta foi o le tagata Aitiope o le eunuka, o le auauna sili a Kanake le tupu tamaitai o Aitiope. O le eunuka o le tagata ua leai ni ona lagona e fia fai toalua. Fai mai e faalogo atu Filipino o loo faitau e le eunuka le tusi a le perofeta o Isaia. Ona faalatalata atu lea o Filipino i le taavale o le eunuka, o loo faitau e le eunuka upu mai le tusi a le perofeta o Isaia, *“Pei o le mamoe ua taitaiina e fasia, pei o le tamai mamoe foi i luma, o le sele fulufulu e le tagi, e faapea foi o ia ua le tautala mai. O ona po o lona faamasinoga, o ai foi se na te talaina lana tupulaga?. Aua ua aveesea lona ola i le lalolagi.”*

O upu nei, o upu e faatatau ia Iesu, le tamai mamoe a le Atua. O iina lava na manao ai loa le eunuka ina ia papatisoina o ia. E tele le taua o le galuega folafola a Filipino, e le gata o le folafola o le Tala Lelei ao le faamaloloina foi o ma'i ma tuli agaga leaga mai tagata e toatele.

GALUEGA FAATINO: Taliga Fesili

1. O le a le tofiga o Filipino?

Tali: O le tiakono

2. O fea sa amata ai lana galuega folafola?

Tali: O Samaria

3. O ai le igoa o le tupu tamaitai o Aitiope?

Tali: O kanake

4. O le a le tusi sa faitauina e le eunuka?

Tali: Tusi a le Perofeta o Isaia.

5. O le a le galuega a le tiakono?

Tali: O le lufilufiina o taumafa, ma tala'i le Tala Lelei

PESE : Ua ou filifili e mulimuli ia Iesu.....


A'OA'OGA:

1. Ia ave lou ola ia aoga mo Iesu ma lana Tala Lelei.

2. E faamanuia le Atua i lana aufaigaluega tala'i

3. Ia faamaoni e pei o Filipo.

FILIPO MA LE EUNUKA :



ASO SA: 9 Fepuari 2020

MATAUPU: UA AMATA LE GALUEGA A IESU

SINI: Ia malamalama le vasega, o le amataga o le galuega a Iesu, ina ua ia te Ia le mana o le Agaga Paia.

TUSI FAITAU: Luka 4: 14 – 22

FESOASOANI MO FAIAOGA:

O lea faatoa uma lava ona faaosoosoina Iesu e le tiapolo. E tusa ai ma le molimau a Luka. O lea e fia faailoa mai e Luka, o le soifuaaga atoa o Iesu ma lana galuega tala'i, e le'i avea lo la tulaga tutusa ma lona Tamā (le Atua) e faamoemoe ai i sona malosi ma sona poto i le faatinoina o lana galuega. Ae sa ia faalagolago i le fesoasoani mai o lona Tamā e ala i le mana o le Agaga Paia. O le mana lea sa ia mafai ai ona tete'e atu i faaosoosoga, e pei o le fia ai.

Ioe, tamaiti o le mana o le Agaga Paia sa faatumuina ai Iesu na mafai ai ona ia tete'e atu i faaosoosoga a le tiapolo. O vaivaiga lava ia faaletagata na osofaia ai e le tiapolo Iesu, o le fia ai, o le fia pule ma le fia iloa. Peitai, na manumalo ai Iesu ina ua ia teena nei faaosoosoga. O iina na atili ai ona fatumuina o ia e le Agaga Paia, ma ua amata ai loa ona a'oa'o atu i ona tagata. Ua lē a'oa'o i totonu o le malumalu, ua ia faitau tusi a Isaia ma nisi o le au Perofeta e faailoa ai ia Iutaia, o ia lava lea ua faataunuuna ai perofetaga, o Ia lava o le Mesia na valoia.

Fai mai upu ua tusia –“*Ua i o'u luga le Agaga o le Alii aua ua na faauu mai ia te au e folafola le tala lelei i e matitiva, ua auina mai a'u e ia e faamalolo i e loto momomo.....*” O upu ia ua iloa le faauuga a le Agaga Paia ia Iesu e amata ai lana galuega talai. O le Agaga na fesoasoani malosi i le galuega a le Alii Faaola.

Tamaiti, e iloa gofie lava le tamaitiiti ua i ai le Agaga Paia o le Atua, e iloa i lana tautala, o lana tu ma le savali ma ana faatinoga uma. Fai mai le molimau a Luka. Na vivii tagata ma ua ofo i upu alofa na saunoa ai Iesu. Ua latou faapea ane, *E lē o le atalii ea lenei o Iosefa?* Ioe tamaiti, e tuufesili tagata o se atalii o ai? O se tama a ai? E ese le tusaafia, e ese le amio lelei o si tamaitiiti. Pe afai tatou te faalauiloa le amio a Iesu, ae tatou te faia pea mea valea ma mea leaga, ona tauvalea loa lea o tatou, ma nai o tatou matua ma nai faifeau ma faletua.

Tatalo i le Atua, e faalua mai lona Agaga e mafai ai ona suia a tatou amio ma ia tatou faia ai amio lelei mo se viiga o le Atua.

GALUEGA FAATINO: Taliga Fesili

1. E fia faaososoga na faaososoina ai e le tiapolo Iesu?

Tali: E 3

2. O le a le malosiaga sa ia Iesu?

Tali: O le Agaga Paia

3. Faamatala mai faaososoga e tolu?

4. O le tusi a ai sa faitauina e Iesu?

Tali: O le tusi a le Perofeta o Isaia.

PESE: 77 PESE MA VIIGA

A'OA'OGA

1. Ia faatuatua i le Atua

2. E leai se mea e faigata i le Atua

3. O le Agaga Paia o le tatu fesoasoani sili

ASO SA: 16 Fepuari 2020

MATAUPU: O TEPORA MA PARAKO

SINI: Ia malamalama tamaiti i le taua, o le valaauina o Tepora ma Parako.

TUSI FAITAU: Faamasino 4: 4 – 9

FESOASOANI MO FAIAOGA:

Faatinoga o le Mataupu:

Talofa Tamaiti? O le tatou tala i leni taeao o le tala ia Tepora ma Parako. O Tepora ole perofeta fafine sa avea ma faamasino ia Isaraelu. O lona toalua e igoa ia Lapitota. Ao nofo o ia i lalo o le pama o Tepora i le va o Rama ma Peteli i le mauga o Efaraima, na o a'e ia te ia le fanauga a Isaraelu ia faamasinoina. . I le tulai mai ai la o Tepora, sa ia faatuina ai Parako, o Parako o le taitai au ia Isaraelu i lea vaitaimi, o le uiga o lona igoa i le gagana Eperu - uila (lightening). Ae i le gagana Arapi o le faamanuiaga. O lona uiga la e fesotai lelei lava uiga o le igoa Tepora, ma

le igoa o Parako. O le malosi ma le faamanuiaga mo Isaraelu. Sa faatonu e Tepora Parako ina ia alu atu ma tau ma faaumatia Iapino le tupu o sã Kananã ma Sesera lana taitaiu.

O i latou ia sa latou faatigaina i le nuu o Isaraelu. Peitai fai mai Parako ia Tepora “*Afai ta te o ma a’u, ona ou alu ai lea, ae afai ta te lē o ma a’u, ou te le alu.*” Ona faapea mai lea o le Perofeta fafine po o le faamasino o Tepora ia Parako. “Ta te o lava ma oe, ae peitai e leai sou viiga i lenei mea e te alu ai oe, aua e tuuina atu e le Alii o Sesera i le lima o le fafine.” E foliga mai i tala a Tepora, o le lima o Parako o le a taitaia e le fafine.

O tala o taua a Isaraelu ma ona toa, e matuã faamaumau lelei, e faapea uiga o upu a Tepora, o le a le faamauina ai se mea lelei e fai e Parako ma o lona uiga o le a tuuina mai e le Alii i le lima o le fafine Iapino ma lana taitaiu o Sesera. Peitai, o le itu lelei i lenei tala, o le galulue faatasi o taitaiu o le nuu, ina ia faatoilalo i o latou fili. O le susulu atu o le malamalama o le uila, ma le malosi ma le suamalie o le taitaiga a Tepora ma Parako ia Isaraelu ua o se faamanuiaga mo i latou.

Ia toe faamanatu ia Isaraelu le alofa o lo latou Atua, o le alofa e le uma, e ui lava ina fulitua ma o ‘ese so’o mai le Atua ae lē mavae le alofa lavea’i o lo latou Atua, le Atua o lo latou augatamã ua mavae, lea lava ua oo mai i o latou aso. O Tepora ma Parako o tagata sa faamoemoe ma faalagolago i le Atua, o i laua o faaola mo le nuu ao feagai ma puapuaga ona o le malosi o Iapino ma sã Kananã. O se aoaoga foi lea mo tatou – Ia tatou faamoemoe ma faalagolago i le fesoasoani mai o le Atua i ai tatou.

Manatu Faapoopo:

O le tofia ai e le Atua o faamasino latou te taitaia lona nuu o Isaraelu, o se tofiga sa faia ma le poto ma le tonu e le Atua, auã sa ala mai i faamasino lona finagalo mo lona nuu. O Tepora o le lona fa ai lea o faamasino talu ina mavae le oti o Iosua. O lo o molimau le Tusi Paia o Tepora o ia foi o le Perofeta fafine. O le Perofeta, o se tagata na te valoia se mea o le a tupu i le lumanai. O ia e tauala mai ai le finagalo o le Atua. O lona uiga la, o le tagata o Tepora o le Perofeta ae o ia foi o le faamasino. O le uiga o le igoa o Tepora, i le Gagana Eperu, o le (Queen bee) po’o o ia o le tinã o lagomeli . O le lagomeli, o le faatusa o le malosi, o le lagomeli e maua mai ai le honey, ma o se oloa sa tamaoaiga ai Palesitina i ia ona po. O lona uiga la, o ia o le tinã, ua ia avatua le malosi mo Isaraelu, e ala i lana taitaiga. O lana taitaiga, ua o se mea suamalie i ona tagata, aua o ia o se tinã loto tele.

GALUEGA FAATINO: PASO **Saili mai upu nei i totonu o le paso?**

Tepora, Parako, Sesera , Iapino.

O	U	P	L	S	K	L	M	I	O
A	S	U	T	E	P	O	R	A	G
A	N	M	P	S	O	P	L	P	F
E	S	V	N	E	E	T	U	I	S
U	G	L	K	R	O	P	U	N	E
A	O	P	P	A	R	A	K	O	F
A	S	I	O	L	P	E	S	A	E
S	A	V	M	N	L	O	P	U	F

PESE: E leai se mea e faigata pe a e faatuatua i le Atua.....

A’OA’OGA:

1. Ia faatuatua i le Atua.
2. Tepora le fafine faamasino
3. O le galulue faatasi e mamā ai se avega.

ASO SA: 23 Fepuari 2020

MATAUPU: O LE ‘OLO O PAPELU

SINI: Ia malamalama le vasega, o le mafuaaga lea o le eseese o gagana a le lalolagi, e mafua mai i le fausiaina o le ‘Olo o Papelu.

TUSI FAITAU: Kenese 11: 1 – 9

FESOASOANI MO FAIAOGA:

I aso lava ia, po o vaitaimi o Noa ma lana fanau, sa tasi lava le gagana a le lalolagi. Peitai, ina ua uma le lolo, ua fanafanau foi ma ua uluola le fanau a Noa. O Hamo na tupu mai ai le tupu o Nimarota, o Nimarota o lona tama o Kuso, fai mai le tala, o Nimarota o se alii na tāua i na vaitaimi o le tagata sili ona malosi. E le gata e malosi i lona poto faafitafita o taua, ae malosi foi

i lona faiva o ia o le tagata tuli manu. Ua avea la lona malosi ua faapea ifo ai i lou loto. O mai ia ina tatou fau se olo ia oo lona tumutumu i le lagi, ia tatou faia foi se mea e ta'ua ai i tatou.

O lona uiga o le manatu o le tupu, o le tagata ua faamaualuga, ua fia ta'uta'ua. Fai mai ua fau le olo ua fiafia tagata, o le a latalata atu ai i le Atua aua o le mau lea a Isaraelu o le Atua e afio i le lagi. Peitai, o le molimau a Kenese, o se e vaai i le Atua e oti ia, e le mafai ona iloa e tagata le Atua i mata faaletino. Fai mai le tala, Ona afio ifo ai lea o le Atua e silasila i le aai ma le 'olo ua faia e tagata. Ua silasila atu le Atua ua avea le tasi o le gagana a le lalolagi ma mea ua faigofie ai ona latou faia o so o se mea, ma e le toe taofia la latou sogasogā e faia so o se mea e le lei i le silasila a le Atua. Ona manatu lea o le Atua, o le a ia faaeeseese i a latou gagana. O lona uiga ua le malamalama le tasi i le gagana a le isi. Ua avea ma faafitauli e poloka ai le fauina o le 'olo. Ua avea foi le eseese o gagana ua faataapepeina ai i latou.

Ioe, e le faigata i le Atua ona vaoia le amioleaga ma le ola agasala o ona tagata. E tele auala e saunia e le Atua e taofia ai le ola faamaualuga ma le fia Atua o le tagata. Ua manatu ifo lava Nimarota ua sili lona malosi. Peitai, o lo o soifua le Atua o Ia e ana mea uma e oo lava i le ola ma le malosi. Toatele tamaiti faapea, ua lē fia faalogo i matua, ua lē usiusita'i i faifeau, faiaoga ma e matutua, ua faeseeseina i le malosi ma le potu, ae galo ai le mea e manuia ai.

O Papelu, o lona uiga na faeseeseina ai e le Atua le gagana a le lalolagi. O le gagana tamaiti, o se mea taua tele i so o se tagata, e iloa oe i lau gagana. Ua avea foi le gagana ma measina a atunuu. O lona uiga o le 'olo o Papelu, na toe liuliu ai le tofa potu a le Atua ma toe faamatagofie atili le palealii o ana galuega i a latou gagana.

Uiga o Upu:

Maaomea: maa taugatā sa fau ai le olo

Pulu emeri: o pulu e fai mai pa'u o laau sa vali ai le olo

Panisina: vali sa vali ai le olo

Faeseeseina : le tutusa gagana

GALUEGA FAATINO: FAATUMU AVANOA

Faatumu avanoa i upu nei?

Fanua, Senara, faeseeseina, gagana.

1. O le uiga o le igoa Papelu o le _____.
2. Sa tasi lava le _____ sa tautatala ai le lalolagi.
3. Ona maua lea e i latou le _____ laugatasi i le nuu o _____

PESE: O Nimarota, Nimarota le tupu malosi

Tupu malosi, tupu malosi x 2
 Ua fau le olo, fau le olo o Papelu
 Olo o Papelu, olo o Papelu x 2
 Le Atua ua faaeseese gagana a le lalolagi
 Gagana, a le lalolagi, gagana a le lalolagi x 2
 E le fiafia le Atua i le faamaualuga
 Faamaualuga, faamaualuga x 2

(fati – Aumai Iesu i totonu o lou loto)

A’OA’OGA:

1. E le fiafia le Atua i le tamaitiiti faamaualuga.
2. O Papelu na faaeseeseina ai gagana a le lalolagi.

MANATU TAIALA O MATI : O LE ATUA E ALOFA

O le uiga mautinoa lava lea o le Atua, o le Atua e alofa mai i ai tatou. E faapena foi le finagalo o le Atua mo tatou le fanau. Ia tatou maua le loto alofa atu i isi tagata. O le alofa lea e afua ai ona nonofo fealofani, e le maua ai se feeseeseaiga i totonu o aiga, nuu ma Ekalesia.

ASO SA: 01 Mati 2020

MATAUPU: O LE FAFINE POLOGA MA LANA TAMA

SINI: Ia malamalama le vasega o le alofa o le Atua na ia faaola ai i le fafine pologa ma lana tama.

TUSI FAITAU : Kenese 21: 8-21

FESOASOANI MO FAIAOGA:

O le mataupu la e 21 o i na faataunuuina ai loa le fetalaiaga a le Atua ia Aperaamo, na folafola e le Atua ia Aperaamo o le a to lana ava o Sara, ona fanaua lea e Sara o lana tama o Isaako, o le uiga o le igoa Isaako o le ‘ata’ata, aua na ‘ata’ata Sara ina ua logo atu iai e agelu o le a to. O le fanau mai ai o Isaako, o iina na tupu ai le ita o Sara ia Akara ma lana tama, ua ia fai atu foi ia Aperaamo, ina ia tuli ese ia o lena fafine pologa ma lana tama. O le vaega tonu lea o loo aumaia ai le manatu autu o le tatou tala, **O le fafine pologa ma lana tama**, E le o se loto o Akara na mafua ai ona to ia Aperaamo, o le loto lava o Sarai, peitai o lea ua avea ma mea mamafa i lona mafaufau, tiga lava la le alofa o Aperaamo i si ona atalii, ae na fetalai le Atua, Aua e te tiga ona o le tama, atoa ma lou fafine pologa.

Ua oo i le aso na sosoo ai, ona ala tulai lea o Aperamo ma tapena meaai ma le faguvai ona tuu atu lea o le fafine pologa ma lana tama e o, Fai mai ua uma le fagu vai, uma foi a la meaai, ua lagona foi le vaivai ona o le mamao o le ala, aemaise o le gaoa o le vao o lo o la uia, Ua vaai atu si fafine pologa i lana tama, ua vaivai ona alu lea ma tuu le tama i lalo o le laau, faimai a ia, ia aua nei pupula ona mata i le oti o si ana tama. O lagona ua leai se faamoemoe, ua na o le oti lava ua faatalitali i ai, ua tagi le tama o Isamaeli, ua leotele, Ioe, faimai le tala Ua faafogaina e le Atua le leo o le tama, ona valaau mai lea o le agelu a le Atua ia Akara, *Akara e, aua e te fefe, aua ua faafogaina e le Atua le leo o le tama. Ina tulai ia ma tago i le tama ma talitali a'e ia te ia i ou lima, aua ou te fai o ia ma tupuga o le nuu tele*, faimai ua faapupula e le Atua ona mata ma iloa ai le vaieli, ona aluatu ai lea ma utu ai le la fagu pau vai ma feinu ai.

E ese le ootia o lenei tala pe a tatou mafaufau i le mea na fai e Sarai i si nei fafine pologa ma lana tama, peitai o le tala lenei e toe faamanatu mai ai mo i tatou le alofa laveai o lo tatou Atua, poo le a le tele o faafitauli ma mea faigata e tutupu i le olaga nei, e fesoasoani mai pea le mana alofa o lo tatou Atua, na tagi le tama ma leotele, o le faailoga o lo tatou valaau atu i le Atua mo se fesoasoani, faimai na faafogaina e le Atua le leo o le tama, o le isi lea aoaoga o le tala, o le Atua e le gata lona alofa, ae na te faafogaina foi mea o loo tatou ole atu ai ia te Ia.

Manatu Faaopopo:

O le mataupu e 16 o le tusi o Kenese o loo faamauina ai, o Sarai lava le toalua o Aperamo na ia tuuina atu lana auauna fafine o Akara ia Aperamo ina ia maua ai se atalii mo ia. O le uiga o le igoa Akara o loo faaliliuina mai i le gagana Eperu a faa Samoa o le *lele* (flight), faimai ina ua iloa e Sarai ua to Akara ia Aperamo ona agaleaga ai lea o Ia ia Akara, ona sola ese ai lea o Akara mai ia te ia. O le sola ese o Akara o loo faatusa i le lele ese i se mea mamao, ua alu ese mai lona matai, o le sola ausulusulu ua lagona le ma ua le o toe fia mafuta i ni tagata.

Peitai na maua o ia e le agelu a le Alii i luga o le vai puna i le vao, ona faapea ai lea o le agelu, Akara e le auauna a Sarai, mai fea oe? Ae tali Akara ua ou sola mai ia Sarai lo'u matai. Ona faapea lea o le agelu ia Akara, Ia e foi atu i lou matai ma e faamaulalo ia te ia, ou te matua faatoateleina lau fanau, Faauta ua e to, o le a e fanaua se tama tane, e te faaigoa foi ia te ia o Isamaeli, o le uiga o le igoa Isamaeli, ua faafogaina e le Atua.

Uiga o Upu:

Tauemu: vaai maualalo, aamu

GALUEGA FAATINO: Taliga Fesili

1. O le a le uiga o le igoa Isaako?
2. O le a le uiga o le igoa Isamaeli?
3. O fea le nofoaga sa fesea'i ai Akara ma lana tama?
4. O le a le upu a le agelu na fai ia Akara?

TALI:

1. Ole ataata
2. Ua faafogaina e le Atua
3. Vao o Peresepa
4. *Akara e, aua e te fefe, aua ua faafogaina e le Atua le leo o le tama. Ina tulai ia ma tago i le tama ma talitali a'e ia te ia i ou lima, aua ou te fai o ia ma tupuga o le nuu tele*

PESE: ISAMAELI MA ISAAKO

Isamaeli ma Isaako
 Le fanau a Aperamo
 Na faamanuia i ai le Atua
 Tupu mai ai nuu e lua

Fiafia laia ma Osana
 Alofa lelei oe Sara
 Ia Akara ma si ana tama
 Ae aua e te agaleaga.....

AOAOGA:

1. Ia tumau le faatuatua i le Atua
2. E le uma le alofa o le Atua mo i tatou
3. E fesoasoani le Atua i soo se tasi

ASO SA: 08 Mati 2020

MATAUPU: O LE FAFINE ELENI

SINI: Ia aoaina le vasega ina ia malamalama o le faatuatua o le fafine Eleni na malolo ai le ma'i o si ana tama.

TUSI FAITAU: Mareko7: 24-30

FESOASOANI MO FAIAOGA:

O le vaega lea o le molimau a Mareko e pei ona fai ai le tatou mataupu i lenei Aso Sa, o loo faa-ulutalaina e faapea, *o le faaaliga o le faatuatua o le fafine o nuu ese*. O le fafine lea e ta'ua, o le fafine Eleni sa fanau i Suria Foinie, o le oo atu la o Iesu i laueleele o Turo ma Saitonu, aua e felatai lea ma le nuu o le fafine, o Suria Foinie. Na manatu Iesu e faalilolilo lona alu atu i Turo ma Saitonu, ia aua nei iloa o ia e tagata, ai ua fia maua e le Alii se malologa mai ana aoaoga ma ana galuega faamalolo. Peitai fai mai le tala a Mareko, a e le mafai ona faaliloina o ia i le fafine Eleni, fai mai o le tama teine a le fafine ua i ai le agaga leaga poo ua uluitoina e temoni, e le o taua mai e Mareko pe faafelea na iloa e le fafine o le itu aso lea e maliu ane ai Iesu, o lona uiga ua leva ona faatalitali le fafine i le aso lea, e lei lilo i le fafine le oo atu o Iesu, lea na alu ifo ai ua faapaū i vae o Iesu, ma faatoga atu ia Iesu ina ia tulia i fafo le temoni mai i si ana tama.

Na silafia lelei e Iesu o le fafine lenei o le fafine o nuu ese, o le fafine Eleni, o le ala lea na ia tali atu ai e faapea. “*Seia lua’i maona le fanau, aua e le tatau ina ave mea e ai a le fanau, ma lafo i uli*. E le logo lelei i la tatou faalogo upu a Iesu pe afai o se isi o i tatou lea na fetalai ai Iesu, ua tatou iloa uma le taumaulaloina o se tagata pe a lafo ai le upu maile, poo le uli (tulou). Peitai o le ta’u masani lava lea a Iutaia i nuu ese, e faatusa o uli poo maile, lea la e malamalama lelei le fafine i le tulaga lea e talanoa atu ai Iesu, peitai e le o le mea taua lea, o le mea taua na sue e Iesu pe moni le alu atu a le fafine mo sana fesoasoani.

Fai mai le molimau a Mareko, I le tali mai a le fafine, *Le Alii e, moni a oe, a e ui i lea o uli i lalo o le laoi e aai i latou i momoi mea a tama*. O le faaaliga lea o le faatuatua o lenei fafine ese, o lana tali atu ia Iesu o loo ia malamalama lelei, o le fanau lea e taua e Iesu, o loo faasino ia Iutaia ao uli o loo faasino i nuu ese, sei mua’i faatino muamua lana galuega faaola ia Iutaia ona oo atu ai lea i nuu ese, peitai ua le mataofia le saili fesoasoani o le tina ina ia ola si ana tama. Na silafia e Iesu le telē o le faatuatua o le fafine, lea na ia fetalai ai. *Ina alu ia ona o lau upu lena, ua te’a le temoni sa i totonu o lau tama*.

Tamaiti, e iai taimi e tofotofoina ai e Iesu lo tatou faatuatua, e iai foi taimi tatou te faapea ai ua le tali mai Iesu i lau tatalo, peitai o le alofa o Iesu e le mafai ai ona ia tuulafoaiina i tatou, e faasoa mai pea lona alofa i taimi e tatau ai. O le tala foi lea o loo ta’u mai ai le alofa faa tina, naunau lava le fafine ia malolo si ana tama, Tamaiti, e iai taimi e maua ai tatou i ma’i, o le taimi tonu lea tatou te iloa ai le alofa faamaoni o nai o tatou matua ia i tatou.

GALUEGA FAATINO: Tali mai i fesili nei.

O fea le nuu o le fafine lea e ta’ua i le tatou mataupu?

Tali: Eleni

O se tama poo se teine le tama a le fafine?

Tali: O le teine

O le a le upu e faamatalaina ai le olaga o le fafine?

Tali: O le faatuatua

Toe tusi mai upu a Iesu na tali atu ai i le fafine

Tali: “Seia lua’i maona le fanau, aua e le tatau ina ave mea e ‘ai a le fanau ma lafo I uli.”

PESE: Alofa Iesu i ai tatou uma....

AOAOGA:

1. O Iesu o le fomai sili.
2. E mafai mea uma i le faatuatua
3. E moni le alofa faa-tinā.

ASO SA: 15 Mati 2020

MATAUPU: UA SOLA IAKOPO I KARANA

SINI: Ia malamalama le vasega ina ia iloa le mafuaaga na sola ese ai Iakopo mai i lona aiga, ma alu i Karana.

TUSI PAIA: Kenese 27: 41-45

FESOASOANI MO FAIAOGA:

Ua tupu le ita o Esau ona o le mea ua faia e Iakopo lona uso ia te ia, ua na o le fia fasioti lava i lona uso le mea ua oo i ai. Na iloa e Repeka le mea o loo i le loto o Esau, e i’u ina fasioti lana tama, ona ia faatonu ai lea o Iakopo e sola i Karana o loo iai lona tuagane o Lapana e nofo ai mo nai aso, seia tea le ita o lona uso. O gaoiga uma ia a le tina o Repeka, na faataunuaina ai le finagalo o le Atua mo lana fanau, auā ana le mataala Repeka e le oo foi faamanuiaga ua uma ona folafola e le Atua mo Iakopo, o lona uiga o Iakopo na filifili e le Atua e fai ma ala o ana faamanuiaga mo lona nuu o Isaraelu. A’o le mafuaaga lea na sola ai, ona ua fefe i lona uso o Esau, nei fasioti ia te ia,

Ua tatou iloa uma le taunuuga o le tala, na alu uma ma le tama o Iakopo faamanuiaga, tatou te faapea ifo, ua ave e le tama o Iakopo faamanuiaga na tuu e maua e Esau lona uso i auala sesē, Peitai a tatou toe faitau mai i tua, o le finagalo o le Atua, e sili ona malosi o le tasi nuu i le isi nuu, e nofo pologa foi le ulumatua i le ui’i. O lea ua faataunu’uina ii fetalaiaga a le Atua, ia Iakopo ma Esau, o faamanuiaga ua ave e Isaako ia Iakopo, o le faamanuia lava lea a le Atua, o Iakopo o se tama e agamalū, o le uiga o lona igoa, o le u’u mulivae, o le isi uiga o lona igoa o le suitulaga, ua ia sui tulaga le tofi o le ulumatua, ina ua ia faatauina mai le tofi o le ulumatua mai

ia Esau lona uso. E foi mai la le tuliga manu a Esau, ua alu Iakopo ma faamanuiaga, e lagona le alofa ia Esau pe a tatou mafaufau i le tigaina na alu ai i le vao, ma le faatonuga a lona tama.

Tamaiti, ua uma lava ona silafia e le Atua, ana faamanuiaga e sasaa mai mo i tatou, Pau lava lea, o lo tatou usiusitai i matua, toaga e tatalo i le Atua, o ia lava na te faamanuia mai i tatou. Ana le sola Iakopo i Karana e le faataunuina folafolaga a le Atua.

Manatu Faaopopo:

O Iakopo o le uii lea o le fanau a Isaako ma Repeka, e ulumatua le tama o Esau, o le fetalaiga a le Atua ia Repeka, E lua nuu o loo i totonu ia te oe, e lua lava nuu e fanau mai ia te oe, e sili ona malosi o le tasi nuu i le isi nuu, e nofo pologa foi le ulumatua i le uii. E tele ina tatou manatu pe a faitau lenei tala, e leaga le mea na faia e le fafine o Repeka, e pei ua ia faatupu le feitaga'i i le va o lana fanau. O le tala masani, faimai ua oo i leisi aso ua fia tausami le toeaina o Isaako i se kuka manogi, ona ia valaau lea o lona atalii ulumatua o Esau, e alu ma lana aufana ma lana utu, i le vao e tuli mai se manu e fai ai se kuka manogi mo ia, ona faamanuia ai lea ia te ia. O le taimi lava lea na faalogo ifo ai le tina o Repeka, ona alu ai lea ua faatonu Iakopo ina ia alu i le fagaga ma aumai ni tamai 'oti se lua ou te faia ai se kuka ona e alu loa lea e ave i lou tama o Isaako ona ia faamanuia atu ai lea ia te oe.

GALUEGA FAATINO: Tali mai ifesili nei.

O ai le ulumatua o le fanau a Isaako ma Repeka?

Tali: O Esau

Aisea na sola ai Iakopo i Karana?

Tali: Na fai iai lona tina ia sola i Karana aua ua fia fasioti lona uso ia te ia

O le a le folafolaga a le Atua mo tama nei, o loo faamatala atu i le tala?

Tali: E sili ona malosi o le tasi nuu i le isi nuu, e nofo pologa foi le ulumatua i le uii.

Ta'u mai tagata autu o loo i le tala.

Tali: Isaako, Repeka, Esau, Iakopo, Lapana

PESE: Isaako ma Repeka, si a la fanau toalua,

Iakopo ma Esau o ia o le tama ulumatua.

Iakopo o le uu mulivae, Esau e taifulufulua,

O i laua lava na taunuu ai le finagalo o le Atua. X2

Iakopo ua ui mai tua, faasee le toeaina matua,

O lea ua ou foi mai nofo mai e tali o lau sua.

Isaako ua faamanuia, alu ia oe ma le fiafia,

Talofa ia Esau ua faoa uma ona manuia. X2

Esau ua toatamai, Iakopo o lona uso moni,
 Leai lava o seisi mea na o le fia fasioti.
 Iakopo ua sola i Karana ma nofo ai ia Lapana,
 Seia galo ia Esau o lana mea ua faia. X2.....

Fati...Pese Misiluki,,(A Ato e fafao ai talo....)

AOAOGA:

1. E alofa le Atua i tagata uma.
2. O Esau ma Iakopo o le uso
3. E faamanuia le Atua pe a tatou usiusitai ma faia lona finagalo.

*

ASO SA: 22 Mati 2020

MATAUPU: UA ALOFA PEA RUTA IA NAOMI

SINI: Ia malamalama le vasega o le faamaoni o le alofa o Ruta na ia mulimuli ai
 pea ia Naomi le tina o lona toalua.

TUSI FAITAU: Ruta 1: 15-19

FESOASOANI MO FAIAOGA

O le tala masani le tala ia Naomi ma Ruta, o Ruta o le teine Moapi, o le teine o nuu ese, sa
 nofotane ia Maalona le atalii o Naomi. Fai mai ua oti Elimeleka, ua maliliu foi tama o Maalona
 ma Kiliona, o se mea e le taugofie mo le tina ia Naomi, o le oti uma o le tama o le aiga ma le
 fanau.

Ua faalogo Naomi ua faamanuia le Atua i Peteleema i lona nuu ma lona aiga, aua sa i ai le oge na
 mafua ai ona o ese ma nonofo i Moapi. Ua ia fai atu foi ia Ruta ma Orepa ina ia toe foi atu i o
 laua aiga. Fai mai le tala, ua toe foi atu Orepa i ona atua ma lona aiga, a’o Ruta ua le mafai ona ia
 tuua o Naomi, fai mai le upu a le tusitala, ua pipii atu Ruta ia te ia, o le faailoga o le alofa ua
 mafanafana, ua le toe fia foi i ona atua, ua ia iloa o loo i Peteleema le Atua moni, le Atua o loo
 auauna i ai Naomi ma lona aiga.

A tatou mafaufau loloto lava i lenei tala, e ogaoga le tiga ua fetaia’i ma Naomi, peitai o le atoaga
 o lenei tala, o loo taoto mai ai le alofa o le Atua. O le alofa lea na faatino e Ruta, o le alofa faa le

Atua, o le alofa e moni, e le mafai lava ona ia tuua le tina o lona toalua, na mulimuli lava Ruta ina ia faamanuia mai Naomi ia te ia.

O le taunuuga lea o le mulimuli a lenei tina, ua tusia lona igoa i le gafa o Iesu le Alo o le Atua na afio mai e togiola le lalolagi. Fai mai upu a Ruta ia Naomi, *o le mea e te alu i ai, ou te alu iai, o le mea e te nofo ai ou te nofo ai foi, e fai lou nuu ma o'u nuu, e fai lou Atua ma mo'u Atua, o le mea e te oti ai, e tanu ai foi a'u*. O le moni lea ma le faamaoni o Ruta ia Naomi, na iloa manino i lana tautinoga lea. Tamaiti e faaaogaina e le Atua lo tatou ola e ala mai ai lona finagalo ma faaalua ai lona mana silisili ese pe afai tatou te alolofa faamaoni ia te ia ma faia lona finagalo.

O le Atua e alofa mai pea ia i tatou, poo le a le tele o faigata tatou te fetiaia'i e le mafai ona ia tuulafoaiina i tatou, o lona alofa faamaoni na ia auina mai ai lona Alo pele e toatasi ina ia faia le faaolataga mo i tatou o lana fanau agasala ina ia mafai ona tatou maua ona manuia e le aunoa.

GALUEGA FAATINO: Ia faatino e le vasega le tala e iloa ai poo ua malamalama

PESE: Ruta o se teine loto tele
 Faamaoni ma le le fefe
 O lana tautoga e oo i le oti
 A ua maua ai lona tofi
 Le tautua a le Moapi
 Ma lona loto sa faatasi
 Tumau pea lo la fealofani
 Seia oo lava i le lagi

AOAOGA

1. E faamaoni le alofa o Ruta ia Naomi
2. E alofa le Atua i tagata uma
3. Ia tatou alolofa i o tatou matua

ASO SA: 29 Mati 2020

MATAUPU: SAITO MA LE TITANIA

SINI: Ia aoaoina le vasega ina ia iloa ma malamalama i le uiga o le faataoto a Iesu.

TUSI FAITAU: Mataio 13: 24-30

FESOASOANI MO FAIAOGA

O faataoto sa faaaogaina tele e Iesu e momoli ai i loto o tagata se feau taua mo le malo o le Atua, o upu faa faatusa a Iesu, e faaaogaina ai mea o le natura ma le siosiomaga e faailoa ai le olaga e maua ai e le tagata le malo o lona Tama.

Pei la o le faataoto lenei i le tagata lulu saito, o le saito o le isi lea alaga tupe tele a Iutaia sa faamoemoe i ai mo le fofoga taumafa, ae faatau atu ma maua ai tupe. Faimai le faataoto, o le tagata ua alu ma lūlū le saito i lona fanua, ua momoe tagata ona alu ane ai lea o le ua ita i lea tagata ua na lūlūina le titania i le fanua.

E tai foliga tutusa laau nei e lua i foliga vaaia, peitai o le titania, e talatala ma pei e matuituia lona tino. O le uiga la o le faataoto a Iesu, o lo’o faatatau i le malo o le lagi, poo le malo o le Atua. O le saito o le upu a le Atua ua lūlūina i loto o tagata, o le upu a le Atua e taitaiina tagata ina ia fai amio mama, amio lelei poo amio faa le Atua, o amioga ia e pei o le alofa, usitai, faamaoni, loto maulalo ma le tele o amio e atagia ai ua tatou talia le finagalo o le Atua. Peitai o le titania o loo faatatau i le tiapolo, e taumafai lava le tiapolo e faasese le tagata, e vaai mai loa le tiapolo ua tatou latalata ia Iesu, ona sau loa foi lea taumafai e faasese o tatou mafaufau, Tamaiti e leai ma ni uiga lelei e aumai e le tiapolo, na o mea leaga lava, e faatupu e le tiapolo le feitaga’i i o tatou loto, e mafua ai ona e ita i lou uso a tagata.

Fai mai ua alu ifo le tasi tagata ua lulu le titania i le fanua, o le ata lea o le tiapolo, poo le a se mea ua lelei e taumafai lava e faa leaga, faimai ua tupu lua le saito ma le titania, ona o atu lea o tagata ma ta’u atu i le pule o le fanua, E te finagalo matou te o atu ma veleeseina ia mea?(titania).

Tuu ia, ia tupu lua pea se ia oo i le seleselega, a oo atu i ona po e selesele ai ou te fai atu ai i e selesele Ia outou mua’i faapotopoto mai le titania, ma outou fusia i fusi e susunu ai, a’o le saito tou te faaputuina lea i lo’u falesaito. O le olaga lea tatou te ola ai, e lua lava itu, o le itu lelei ma le itu leaga, o mea lelei ma mea leaga. E leai se isi e filifili i le leaga, o tatou tamaiti tatou te filifili e fai mea lelei, aua o mea ia e manuia ai o tatou olaga. Aua tatou te vaavaai fua i amio a isi o tamaiti, a fai e le isi tamaitiiti se mea leaga ia e fautua iai, ia tatou fai mea lelei ma amio lelei, aua o uiga ia faa Iesu.

Tuu pea le faaiuga o le tagata amio leaga o le mea lenā e patino i le Atua, e le fiafia le Atua i le amio leaga, ae ‘au o Ia i le tamaitiiti ae amio lelei ma alofa atu ia te Ia. O Iesu o le faaaliga lava lea o le alofa o le Atua, o a ni a tatou amio leaga, o le loto salamo e manao i ai le Atua, ia liua o tatou loto leaga i le loto lelei ma fai ai amio lelei e viia ai le Atua.

Uiga o Upu:

Luluina: faasalalau solo

Seleselega : taimi e matua ai le fua

GALUEGA FAATINO: Tusi mai ni amio lelei se 10 ma ni amio leaga e 10. Ia toe faamanatu i tamaiti, e le lelei le fai amio leaga.

PESE: Ua ou filifili e mulimuli ia Iesu

AOAOGA

1. E le fiafia Iesu i le tamaitiiti amio leaga
2. Ia faalogo ma usita'i i upu o le Tusi Paia.
3. O le alofa o le uiga faa Iesu.

MANATU TAIALA O APERILA : FAAMAONI

O le faamaoni o le tasi lea o uiga faa-le-Atua. O se uiga lelei e iloa ai le faamoemoeina i se mea e faia. O se uiga e tatau lava ona tausisi ai le fanau. E manuia le olaga tuputupu a'e o le tamaitiiti e faamaoni i soo se mea e na te faia.

ASO SA: 05 Aperila 2020

MATAUPU: UA AMATA PUAPUAGA O LE MESIA

SINI: Ia malamalama le vasega, o le Aso Sa leni o le Malaga faa Tupu a Iesu i Ierusalem a poo le Aso Sa o le Laupama, o le amataga lava lea o le agai atu o Iesu i ona puapuaga.

TUSI FAITAU : Mareko 11:1-10

FESOASOANI MO FAIAOGA

O le amataga lea o le aga'i atu o Iesu i ona puapuaga, fai mai le molimau a Mareko, Ua faalatalata atu i latou i Ierusalem, ua oo i Petefake ma Petania, i luga o le mauga o Olive. O le

taua ai o nuu nei ma le mauga o Olive, o lea ua vaavaai atu Iesu i le mea e faataunuuina ai lana feau. O le mauga foi lea fai mai na aveina a'e ai Iesu i le lagi, ina ua mavae le 50 aso talu lona toetu mamalu mai i le oti ma le tuugamau.

A'o le aso foi lenei e faataua ai le galuega a le asini, o le asini o le faailoga o le filemu, o le Tupu ua afio mai, e aumai le filemu i le lalolagi. O le asini sa faaaoga e tupu ma perofeta i le Feagaiga Tuai, e seasea faalogo i se tupu poo se perofeta o tietie mai i se solofanua. Lea foi la ua oo mai i le taimi o Iesu ua filifilia e Iesu le asini, e tietie ai i lana Malaga faa-Tupu i Ierusalema. O le tamai asini e pei ona faatonu e Iesu ona soo e toalua e o e tatala mai, e lei tietie muamua ai seisi, O le mea manaia i le tala lea, o le asini e avanoa i taimi uma, toatele tatou tamaiti a alu atu ai le feau a le faifeau ma le faletua ae fai mai e le o avanoa, aea le asini na avanoa ina ia momoli atu le Tupu.

E le itiiti le taua o lenei Aso Sa, o le aso tatou te manatua ai le Malaga faa Tupu a Iesu, le Aso Sa o le Laupama, o Pama, o le faailoga o le manumalo, e ui a o le aga atu o Iesu mo ona puapuaga, a'o puapuaga na manumalo ai.

Fai mai le alaga na lagona i lea aso, "Osana, Osana, Ia manuia le afio mai i le Suafa o Le Alii. Ia manuia le malo ua oo mai o lo tatou Tama o Tavita, Osana i mea e aupito i luga". Osana o lona uiga o le vivii, Ia faaola mai, Peitai o tagata lava ia na toe alalaga Faa satauro, faa satauro ia te Ia. O le ulufale atu o Iesu i Ierusalema, o le ulufale atu i ona puapuaga.

GALUEGA FAATINO: Faatino le tala o le Aso Sa Laupama

PESE: Here comes Jesus riding into town

Cloaks and branches

Throw them to the ground

Praise and glory

Everybody sing.

Sing hosanna , hosanna to the king.

Blessed is he who comes our way.

He brings a new and brighter day

The poor are saved, the blind can see

The captive souls are dancing free. Yeah;

AOAOGA

1. O Iesu, o le tupu o le lagi ma le lalolagi
2. Sa tietie Iesu i le asini
3. O le asini o le manu filemu

ASO SA: 12 Aperila 2020

MATAUPU: TUUGAMAU AVANOA (ASO SA O LE TOETU)

SINI: Ia malamalama tamaiti i le uiga o le tuugamau avanoa, ua leai Iesu sa tanumia ai ae ua toetu.

TUSI FAITAU: Mataio 28: 1- 10

FESOASOANI MO FAIAOGA

Tamaiti, o le Aso Sa foi lenei o lo o faamanatuina ai e le au kerisiano le toetu manumalo mai o Iesu nai le oti ma le tuugamau. Fai mai le tala a Mataio, o Maria le Makatala ma le isi Maria na mua'i oo i le tuugamau o Iesu, na usupo a nai tina e ave teu fugalaau ma mea manogi e asi ai le tuugamau o Iesu.

Peitai e ese le vaaiga na iloa e nei tina i le vaveao, Ua to le mafuie tele, ona alu ifo lea o le agelu mai le lagi, ua fuli ese le maa ma tietie i ona luga, ua sinasina ona ofu e pei o le kiona ma ua pupula mai e pei o le uila. O e sa leoleo i lea mea, ua fefefe ma ua matatau i lea vaaiga uiga ese, fai mai le molimau a Mataio ua liua i latou e pei o tagata oti.

E talitonu na oo foi i fafine e toalua le lagona fefe, aua o se vaaiga e le masani ai. Ae na liua lo la fefe ina ua tautala mai ia te i laua le agelu. E 4 vaega taua na ta'u atu e le agelu i tina nei, Muamua, "*Aua lua te matata'u*" o le vaivaiga lea o soo se tagata o le fefe, o lona uiga, o loo faapea mai le agelu, o le Tala Lelei lea o le a avatu, ia aveese muamua le fefe ao sauni e tala'i le Tala Lelei o le Iesu toetu.

Lua, "*E le o iinei o Ia*" Ua le o toe i ai Iesu i le tuugamau, ua toe soifua manumalo, o le fulieseina o le maa, o le faailoga o le ulu atu i totonu o le tagata i le tuugamau avanoa, sei vaai le tagata e moni lava ua toetu Iesu. Tolu, "*Omai ina matamata*" o lona uiga omai sei vaavaai e moni lava ua leai le Alii, sei matua faamautu le Tala o Iesu ua toetu manumalo.

Fa, "*Ina o atu ia ia vave*" ia faavave ona o atu e tala'i atu le Tala Lelei ua lua maua, Ua toetu Iesu, Na faailoa e le agelu i tina nei, le Tala o le Toetu ina ia o atu ma ta'u atu i le au soo aemaise o le nuu atoa, o ulua'i misionare ia na aumaia le Tala o le Toetu, o Tina.

O le aso foi lenei e faatāua ai le Easter egg, o le mafuaaga lava lea o le faamanatuina o le tuugamau avanoa, poo le aso na toetu ai Iesu, o totonu o nei fuamoa e leai se mea o i ai, o nisi ua latou valivali i le lanu mumu o le faatusa o le toto o Iesu, ma le avanoa o le fuamoa e leai se mea

o iai o le faatusa o le tuugamau ua avanoa, ua leai Iesu ua toetu manumalo mai le oti ma le tuugamau.

GALUEGA FAATINO: Faatino le vaaiga o le Toetu

PESE: Pese ma Viiga 48

AOAOGA

1. Ua toetu manumalo Iesu nai le oti ma le tuugamau
2. Tina ave feau o le Tala Lelei
3. Ua fulieseina e le agelu le maa, mai le gutu o le tuugamau.

ASO SA: 19 Aperila 2020

MATAUPU: FAI FAIVA O LE TALA LELEI

SINI: Ia malamalama le vasega o le fai ma fai faiva o le Tala Lelei, o le tagata lea e sailia agaga mo le Atua ma lona malo.

TUSI FAITAU: Mataio 4: 18-22

FESOASOANI MO FAIAOGA

O le vai o Kalilaia o se vai tuloto tele, i le taimi o Iesu, e 30 vaega o le aai e fai ma taulaga o le au faatau i'a, e aofia ai ma le aai o Kapanauimi e tele atu i lo isi. O le vaega tonu lea na valaauina ai e Iesu Simona Peteru ma lona uso o Anetelea. O tama nei e toalua sa la faalogo muamua ia Iesu ma ana aoaoga, o le ala lea na faigofie ai ona la tuua lo la faiva ae mulimuli atu ia Iesu, aua ua la iloa lelei le tagata lea ua valaau atu.

Ua fetalai atu Iesu ia te i laua, "Ina mulimuli mai ia ia te a'u, ou te faia oulua ma faifaiva i tagata." O le galuega lea sa tausi ai o la matua ma lo latou aiga, o le fagota. O tagata ua fai mo laua le sami ma le vai e fagogota ai. O le galuega sa maua ai le tamaoaiga e tausi ai lo la aiga. Peitai na tuua e tama, ae ua usitai i le finagalo o Iesu ma ua mulimuli atu ai loa e fai ma soo o le Alii o Iesu.

Sa faapea foi le valaauina o le isi uso e toalua, o Iakopo ma Ioane le fanau a le tagata e igoa ia Sepetaio. O le valaau lava foi lea e tasi na valaau ai Iesu i lea au uso, Ua tuua e le au uso lo la tama ma le vaa ae ua mulimuli ia Iesu.

O le valaauina o soo o Iesu, na valaau lava Iesu i tagata fai faiva. O le fesootaiga o le galuega faa fai faiva o le fagota ina ia maua ni i'a aua le taliuta, o le finagalo la o Iesu, suia mai le fagotaina o i'a, i le sailia o agaga mo le Atua ma lona malo. Ia faaaogaina le metotia faa faifaiva e saili ai agaga mo le Atua, A tele i'a o se faiva e fiafia le taliuta, e faapena le finagalo o Iesu, e fiafia le Atua pe afai e maua ni agaga se tele mo Ia.

O le tagata ua filifilia e fai ma fai faiva o le Tala Lelei, o le Tusi Paia lana auupega, o le Tusi ua tusia i le Agaga Paia o le Atua, o upu e momoli atu ai se feau ina ia faaolaina agaga ma ia savavali tagata e tusa ma le finagalo Paia o Le Atua.

Tamaiti, ia amata atu nei ona teu i lou loto, e manaomia e Iesu i tatou e fai ma fai faiva o le Tala Lelei, e fai ma avefeau e momoli le finagalo o le Atua, ma saili agaga mo le malo o le Atua. E le o tatou uma e fai ma faifeau, peitai o soo se valaauina o valaauina mai i Le Atua, Tamaiti ia atagia i a tatou amio o i tatou o isi faifaiva o le Tala Lelei, ia e usitai ma faalogo i ou matua, ia toaga e faitau le Tusi Paia ma Tatalo i aso uma. Ia e faailoa atu i au uo i le aoga ma soo se mea le finagalo o le Atua mo ona tagata ina ia toatele e fia mulimuli ma fai Iesu ma o latou Alii ma Faaola.

GALUEGA FAATINO: Faatino le tala i le valaauina o soo o Iesu. Ia ia i ai nisi e fai ma soo o Iesu ua valaauina. Ia manino upu na fetalai ai Iesu.

PESE: Ou te faia outou ma faifaiva i tagata (I will make you fishers a man)

Ou te faia outou ma (fai faiva i tagatax3)x2
Pe afai tou te mulimuli ia te au x3

AOAOGA

1. Ia fai i tatou ma faifaiva e saili agaga mo Iesu
2. Faalogo ma Usitai i le finagalo o Iesu
3. Faitau le Tusi Paia ma Tatalo i aso uma

ASO SA: 26 Aperila 2020

MATAUPU: ELISAIA- O LE AUAUNA A LE ATUA

SINI: Ia aoaoina le vasega ina ia malamalama o le mana o le Atua na mafai ai e Elisaia ona faia o vavega

TUSI PAIA: 2 Tupu 5: 1-19

FESOASOANI MO FAIAOGA

E le fou le tala i le faamaloloina o le ma'i lepela o Naamanu le auauna a le tupu o Suria, O Naamanu o se toa malosi sa matua faamoemoeina e le tupu o Suria ae pau lona, e ma'i lepela. O le ma'i o le lepela, e mafoe le pa'u pei e papala, o se ma'i sa inosia ma sa ave foi i tua pa o le aai i latou e maua i lenei ma'i.

O le teineitiiti Isaraelu sa ave faa tagata o taua, sa fai ma auauna a le toalua o Naamanu, o ia lea na ia ta'u atu i le toalua o Naamanu, le perofeta poo le auauna a le Atua o loo i Samaria, o Elisaia lona igoa, e mafai na ia faatea i le lepela o Naamanu. O le upu moni e lei talia gofie e le toalua o Naamanu le tuualalo a le teineitiiti, aua foi o lo o i ai foi o latou atua o loo talitonu ma tapuai i ai.

Peitai na usitai lava, e oo i le tupu o Suria, ua ia ave le tusi i le tupu o Isaraelu ina ia alofagia lana auauna ma ia faamalolo i lona lepela. E ui a ina le fiafia le tupu o Isaraelu ina ua avatu le tusi a le tupu o Suria, peitai na lagona e Elisaia o le finagalo o le Atua, ia faamalolo Naamanu.

Na faatonu e le perofeta Naamanu ina ia alu ma taele faa fitu i le Ioritana, fai mai Naamanu e le sili ea Apana ma Farapa o vai o Tamaseko i vai uma o Isaraelu, ou te le taele ai ea ma mama ai. Na uma loa ona tofu faa fitu Naamanu fai mai ua te'a ai lona lepela, o leisi lea vavega tele na faia e Elisaia talu mai ona aveeseina o Elia ae faalua mai le agaga o Elia mo ia.

Tamaiti o le mea ia manatua o Elisaia o le auauna faauuina a le Atua, o ia lea sa faaauuina galuega faa perofeta a Elia. O Faifeau o suli vaaia ia o le Atua i le lalolagi, o i latou ua ta'ua o auauna a le Atua, o loo latou faailoa mai le finagalo o le Atua e ala i le laugaina o le Tusi Paia. O i latou ua faauuina mo le talaiina o le finagalo Paia o le Atua i le lalolagi.

GALUEGA FAATINO: Taliga fesili

1. O le a le ma'i o Naamanu?

Tali: O le ma'i lepela

2. O le a le tofiga o Naamanu?

Tali: O ia o le toa, ma le alii e pule i 'au a Suria

3. O le a le faatonuga a Elisaia na fai ia Naamanu?

Tali: E alu e taele faa fitu I le Ioritana ona mama ai lea o lona lepela.

4. O ai le igoa o le perofeta sa mulimuli iai Elisaia?

Tali: O Elia.

PESE: 157 Pese ma Viiga

AOAOGA

1. O Elisaia o le auauna faauuina a le Atua
2. Ua faamalolo e Elisaia le ma'i lepela o Naamanu
3. E ofoofogia mea e faia e le mana o le Atua

MANATU TAIALA O ME - TINĀ E OLA SAILI

O le tinā e ola saili, na te tapenaina auala e manuia ai fanau, o lona aiga, nuu, Ekalesia ma le atunuu. E musu e ola toilalo ma fa'alumaina fanau i faafitauli o le soifuaga. O le tinā e saili i manuia o le Atua, e mafai foi ona tatou faapea ane, o se tinā fa'atuatua ma le alofa.

ASO : 3 Me 2020

MATAUPU : UA FANAU MAI MOSE

SINI : Ia malamalama le vasega, o le tinā e ola saili na te iloa lava auala e manuia ai lana fanau

TUSI FAITAU : Esoto 2: 1-9

FESOASOANI MO FAIAOGA

O le tala lenei i se tinā Eperu o le afafine o Levi, e le'o faaailoa mai lona igoa, a ua atagia mai ai le ata o se tinā e ola tauivi ma finafinau e saili auala e fa'aolaina ai si ana tama. Ua fa'alogo lenei tinā ua fai e Farao se tulafono e fasiotia uma ai pepe tama Eperu ae faasao na o pepe teine.

Ona manatu lea o lenei tinā Eperu, e sili ai pe a saili auala loa e laveaiina ai lana pepe tama ina nei fasiotia, auā ua ia le mafai ona na ia te ia ina ua mavae masina e tolu. Ua ia faia le ato kome, na ia puluti ai i le pulu emerī ma le pulu safeta, ma ia tuu i ai le tama ona tuuina atu lea i le vao utuutu i le auvai o le vaiatafe. A ua tu mamao atu lona tuafafine ma vaavaai pe i'u ina faapefea o ia.

A'o le taimi lea na alu ifo ai le afafine o Farao e taele i le vaiatafe, ua ia iloa atu le ato kome o lo o i le vao utuutu, ona ia auina atu lea o lana auauna fafine na te aumaia. Ua ia tatala ona ia iloa ai lea o le pepe o taoto ma tagi, ua manatu foi o ia o le pepe Eperu o ia. Ua alu atu lona tuafafine ma fai atu i le afafine o Farao, e alu e aami i se failele Eperu na te tausī le tama mo ia. Na malie i ai le afafine o Farao, ona alu lea o le teine ma aami i lona tinā.

Ioe tamaiti, o le taunuuga o le tala, na toe tausi lava e le tinā e ona le pepe lana tama, ona ia ave lea e fai ma tama a le afafine o Farao. Ua ia faaigoa ia te ia o Mose auā ua faapea ia “Auā na ou toina a’e o ia i le vai.” Ua ola Mose ona o le galuega na faia e lona tina. O se aoaoga foi lea mo tatou le fanau. E faia e o tatou matua galuega lelei, e tausi foi i ai tatou ina ia tatou ola manuia ma ola fiafia. Ao le a se galuega a tatou le fanau e ao ona fai?? Ioe ia tatou faalogo ma usitai i o tatou matua. Ia manuia tele outou le fanau.

Uiga o Upu:

vao utuutu – o le vao lea e ola i nofoaga faa-taufusi
 ato kome – o le ato e fau i laau
 pulu emeri- suau’u, ka
 pulu safeta- o le pulu lea e fai mai pa’u o laau

GALUEGA FAATINO: Taliga Fesili

Tali fesili nei

1. O le a le tulafono na faia e Farao i pepe tama Eperu?
Tali: Ia fasiotia uma i latou pe a fanan au mai
2. Aisea na saili ai e le fafine Eperu se auala e faasaoina ai lana tama?
Tali: Ina ne’i fasiotia lana tama e Farao
3. O ai na mauaina le ato i le vao utuutu?
Tali: O le afafine o Farao
4. Ta’u mai le igoa o le pepe sa faasaoina?
Tali: O Mose
5. O le a le uiga o lona igoa?
Tali: Auā na ou toina a’e o ia nai le vai

PESE – Le Alofa o le Atua e ofoofogia.....

A’OA’OGA

- 1 Saili faatasi ma le Atua e manuia ai
- 2 E taua o tatou tinā
- 3 Lototele e fetaia’i ma faafitauli o le olaga

ASO SA : 10 Me 2020 (Aso Sa Tinā)

MATAUPU : O MARETA MA MARIA

SINI : Ia malamalama tamaiti i le tāua o le ola saili ia Iesu ma ave i ai la tatou faamuamua, auā tatou te maua ai manuia, ae le o mea a le lalolagi.

TUSI FAITAU : Luka 10: 38-42

FESOASOANI MO FAIAOGA

Tasi lea tala o loo atagia mai ai le tinā e ola saili i le Atua ma ave i ai lana faamuamua, ae le o mea a le lalolagi e pei o Maria. O le eseese o faamamafa a Maria ma Mareta, o loo pupū lona loto i mea e tele, i le tapenaina o le taumafataga mo Iesu, ao Maria lona uso ua ia filifili e fia faalogologo i aoaoga a Iesu. O le tinā e naunau lona loto ma faalagolago i mea a le lalolagi ma le tinā e faataua ia te ia Afioga a le Atua, e fa'alogo ma usitai i ai. Ua le fiafia Mareta ia Maria ona ua ia le fesoasoani atu ia te ia i le faiga o le fatuaiga tausi, ma ua pei ai ua faaseā Mareta ia Iesu ona o Maria lona uso. O le upu moni, ua fai mea vaavaai Mareta po ua tiga foi lona loto ina ua ia faamuamua Iesu ae le o ia.

Peitai o le aoaoga o loo faamamafa mai i le tala, poo le a lava galuega ma tiute tatou te faia, ia ave lava le faamuamua i le Atua, tatou te saili muamua i le Atua ae le o mea a le lalolagi. A faamuamua le Atua e manuia, ae a faamuamua le lalolagi e malaia. Sa naunau lava Maria e fia faalogologo ia Iesu ma ana aoaoga, auā ua ia mautinoa e manuia ai lo laua aiga ma lona uso o Mareta.

O le manatu o Maria ia faataua le taimi ua latou mafuta ai ma Iesu ma a aunoa ma Ia ua leai se aogā o mea la te faia. O le aoaoga mo tatou le fanau, ia tatou mafuta i le Atua i taimi uma e ala i le tatalo ma faitau ana Afioga Paia, usitai i faifeau ma matua, ma ia alofa i soo se tagata. Aua foi tatou te fai feau fevaavaaia'i i isi o tatou uso a tagata. Ia tatou ola fealofani ma ave la tatou faamuamua i le Atua e manuia ai o tatou olaga. Ia manuia tele outou le fanau ma aoaoga i lena vaiaso.

Uiga o Upu:

Fatuaiga – tausi le aiga, tautua le aiga

Pupū – naunau, tosina, manao tele

GALUEGA FAATINO

Faatino e le vasega le tala ma ia saunia e lau susuga ni fesili fa'atupu manatu ina ia e silafia ai o lo o malamalama i latou i le uiga ma le taua o lenei tala.

PESE – UA OU FILIFILI E MULIMULI IA IESU

Ua ou filifili e mulimuli ia Iesu
 Ua ou filifili e mulimuli ia Iesu
 Ou te le toe foi, ou te le toe foi
 Le satauro i o'u luma, le lalolagi i o'u tua
 Le satauro i o'u luma, le lalolagi i o'u tua
 Ou te le toe foi, ou te le toe foi
 Ua na'o au lava, e mulimuli ia IESU
 Ua na'o a'u lava, e mulimuli ia IESU
 Ou te le toe fo'i, ou te le toe fo'i

A'OA'OGA

- 1 Faamuamua le Atua i taimi uma
- 2 Aua le fai feau feavaaia'i
- 3 Alofa i o tatou uso ma soo se tagata

ASO SA : 24 Me 2020

MATAUPU : O LE AUGANI A PATESEPA

SINI : Ia malamalama le vasega, o le tinā e alofa moni i lana fanau na te sailia auala e maua ai e fanau manuia o le Atua.

TUSI FAITAU : 1 Tupu 1: 15-31

FESOASOANI MO FAIAOGA

O Patesepa o se tinā e finau tele e saili auala e manuia ai si ana tama o Solomona. Ua fa'alogo lenei tinā ua faamalosi Atonia le tama tane a Akita o le tasi o avā a Tavita, ina ia fai o ia ma tupu ia Isaraelu, e lei toe faatali loa Patesepa a ua alu atu ia Tavita e ta'u i ai le mea ua tupu. O le naunautaiga o Patesepa o lona sailia lea o se auala e fai ai Solomona ma tupu ae le o Atonia. Sa

faamanatu foi e Patesepa ia Tavita upu uma na ia tauto ai e uiga ia Solomona e tulai mai e fai ma tupu e seei i le nofoalii o Isaraelu pe a mavae atu ia. A leai, ona ta'uagasalaina lea o i laua ma lana tama o Solomona pe a taoto le tupu faatasi ma ona tama.

Ua fetau lelei le naunau atu o Patesepa e saili auala e faaeaina ai Solomona, ma le ulu atu o Natano le perofeta i le potu o le tupu, ma faamanatu atu ia Tavita i le fai ai o Solomona ma tupu ae le o Atonia. O lo o tautala atu Natano ia Tavita ina ia fai o ia ma faamaoniga o upu uma a Patesepa na ia fai atu ai ia Tavita. Mulimuli ane, ona tali mai lea o le tupu o Tavita ia Patesepa, ua tauto o ia ia te ia e fai lava lau tama o Solomona ma tupu e pei ona ou tauto ai i le Alii le Atua, e tietie foi o ia i lo'u nofoalii e sui ai a'u.

Ioe le fanau, o le taunuuga lena o le sailiga sa fitaituga i ai lenei tinā o Patesepa, ona o lona alofa ia Solomona lana tama ina ia manuia lona olaga. Na avea lava Solomona ma tupu ia Isaraelu e sui tulaga i lona tama o Tavita. O le alofa o Patesepa i lana tama, e faapena foi le alofa o o tatou matua i ai tatou, o le alofa lava lea o le Atua. O le alofa o matua lea e ave ai tatou i le aoga, lea e fafaga ai tatou i aso uma. Ia tatou maua le lagona faafetai ona o le alofa o matua i ai tatou...Ia manuia tele outou le fanau.

GALUEGA FAATINO: PASO

Saili mai upu nei i totonu o le paso?

Solomona, Patesepa, Atonia, Tavita

S	F	I	O	K	P	E	F	K	A
S	O	L	O	M	O	N	A	L	T
T	S	A	E	V	N	M	M	K	O
A	A	O	P	U	T	F	D	V	N
V	A	S	F	O	P	U	L	K	I
I	E	P	A	T	E	S	E	P	A
T	S	F	O	P	U	N	M	K	L
A	E	S	A	T	F	N	M	L	O

PESE: GIVE ME JOY

Give me Joy in my heart, keep me praising x3

Give me joy in my heart, I pray
 Give me joy in my heart, keep me praising x3
 Keep me praising till the break of the day

Chorus

Sing hosanna, sing hosanna
 Sing hosanna to the king of kings
 Sing hosanna, sing hosanna
 Sing hosanna to the kings
 Give me peace in my heart, keep me resting x3
 Give me peace in my heart I pray
 Give me peace in my heart keep me restingx3
 Keep me resting till the break of day

Give me love in my heart, keep me serving x3
 Give me love in my heart I pray
 Give me love in my heart, keep me serving x3
 Keep me serving till the break of the day
 Sing Hosanna.....

AOAOGA

- 1 E manuia le tagata e saili i le Atua
- 2 Aua le fefe e finau i le mea moni
- 3 O le faamaoni o le alofa faa-tinā

ASO SA - 31 Me 2020 (Aso Sa Penetekoso)

MATAUPU - ANA LE PEROFETA FAFINE

SINI - Ia malamalama le fanau ia ola saili i le Atua e ala i anapogi ma talosaga i aso uma i le ao ma le po

TUSI FAITAU - Luka 2: 36-38

FESOASOANI MO FAIAOGA

O Ana le perofeta fafine o le afafine o Fanuelu mai le ituaiga o Asera. E na o le fitu tausaga na nonofo ai ma lona toalua ae oti loa. Ua valugafulu ma le fa tausaga o lona soifua ae lei alu ese lava o ia ma le malumalu, e auauna ai i le Atua e ala i anapogi ma talosaga. O lona uiga o le tele o aso ma tausaga o Ana sa saili ai i le Atua i le malumalu i le ao ma le po, e talotalo i lona Atua ma faanonō manū i le Atua auā se manuia mo lona aiga ma lona nuu o Ierusalem.

Ua oti lana tane ma e ausage foi lona aiga, e pei e foliga mai ua leai se faamoemoe o Ana ma ua pei o se tagata ua tuulafoaiina ma inosia e tagata. Ae peitai ua le o lea le manatu o Ana, e lei mu itiiti le lamepa o lenei perofeta fafine e faalagolago ai i le taitaiga a le Atua. Sa lototele ma finau pea Ana e saili i le Atua i le malumalu anapogi ma talosaga ma lona faanaunautaiga, na pau a lea o le auala e manuia ai ia ma lona nuu.

Fanau, e taua tele le aoaoina oi tatou e anapopogi ma tatalo i le Atua, e le gata o le malumalu a’o totonu foi o o tatou aiga i faigalotu i taeao ma afiafi ma le aso Sa. A faatasi le Atua ma i tatou e ala i lo tatou saili atu ia te Ia, ona manuia lea o i tatou le fanau, manuia aiga, nuu ma le Ekalesia.

Uiga o upu:

perofeta – tagata vaai, auauna a le Atua

anapogi – tatalo, le ai, le inu

togiola – lavea’i, faaola

GALUEGA FAATINO: Faatumu mai avanoa i upu nei:

Fanuelu, ao, anapogi, fitu, ituaiga, oti, malumalu, po, perofeta.

O Ana o le fafine, o le afafine o o le o Asera. E na o le tausaga na nonofo ai ma lana tane ae loa o ia. Sa auauna o ia i le Atua i le i le ma le, e ala i ma talosaga.

PESE –TU’ITU’I

Tu’itu’i, tu’itu’i

O ai ea o loo iina

Faalogo, faalogo, aua le pisa

Tatala, tatala, ma vaai atu

O Iesu lena

O loo tu’itu’i mai

AOAOGA

1. E faafogaina e le Atua a tatou tatalo
2. Lototele e faatino o tatou tiute
3. Saili i le Atua e ala i tapuaiga i le ao ma le po

MANATU TAIALA O IUNI : FAAALIA O LE SILISILI ESE O LE ATUA

E faaalua le silisili ese o le Atua i mea uma o le foafoaga, o laau ma manu e oo lava i le tagata. E gata lo tatou iloa ma le silafia faale-tagata auā o o tatou manatu ma lagona, e le o le finagalo lea o le Atua. O lona uiga, o tatou o tagata faatauvaa tatou te le feagai ma le mamalu silisili ese o le Atua. Peitai ua na o le tagata e fa'atuatua ma le faamaoni ma faamoemoe i le mana o le Atua, tagata lena e faaali i ai le silisili ese o le Atua na te mafaia ai ona faaalua mea moni i nisi tagata.

ASO SA - 7 Iuni 2020

MATAUPU - O MITI A FARAO

SINI - Ia malamalama le fanau, i miti a farao ma o latou uiga

TUSI FAITAU - Kenese 41: 17-30

FESOASOANI MO FAIAOGA

Fai mai miti a Farao – Na ia tu i le auvai o levaitafe. Faauta foi, na o a'e i le vaitafe o povi e fitu e tino lelei ma le pepeti, na latou aai i le vaofali. Faauta foi, ona o a'e ai lea o isi povi e fitu e matua tino leaga ma paeae. Ua aina e povi paeae e fitu o povi pepeti e fitu, ae tumau pea lo latou tino leaga ma paeae. Ona ala lea o farao, ua toe moe ona toe fai foi lea o le isi ana miti. Fai mai na ia iloa na fua mai o 'au saito e fitu i le 'au e tasi, e soona puputa ma le tino lelei mai. Faauta na mulimuli ane tutupu mai ai o isi au saito e fitu e laiti ma tino leaga, ma le mamae mai le matagi mai sasa'e. Ona folo ai lea e au saito tino leaga e fitu o au saito tino lelei e fitu, ae tumau pea lo latou tino leaga. O uiga o nei miti – o tausaga e fitu o le a tele pea meaa. A mavae ia tausaga e fitu ona oo mai ai lea o le oge tele.

O miti a Farao ua faaalua mai ai le silisili ese o le Atua e ala ia Iosefa, ina ua ia mafai ona faamatalaina uiga o nei miti e lua ma o la taunuuga, ae aunoa ma se isi o le au popoto ma faataulaitu a Aikupito latou te iloa. Manatua foi o Iosefa lea na inosia e ona uso ma faatau atu i tagata Mitiana, lea lava na faa falepuipuiina i Aikupito a'o lea ua faaali i ai le Atua. E tusa ai

ma le tala, sa manino lelei ia Iosefa uiga o miti a Farao auā na ia talitonu o lona Atua na te avatua se tali lelei e uiga i ia miti.

E ese le mata'utia ma le silisili ese o le alofa o le Atua ua faaali ia Iosefa, auā e foliga mai Iosefa o se pagota ua le o toe amanaiaina ma ta'u faatauvaaina e ona uso, ua tagata esea mai lona aiga, a'o lenei ua faaalua mai ai le silisili ese o le Atua i lona faatauvaai. Ua avea lona faamatalaina o miti a Farao e siitia ai lona tulaga i totonu o Aikupito ina ua avea ma pule, a o se auala foi lea e manuia ai lona aiga ma lona nuu o Isaraelu.

Tatou le fanau, ese le manaia o le tagata e faamoemoe ma talitonu e mafaia e le Atua ona fai soo se mea e oo lava i mea faigata o le soifuaga. O le tagata lena poo fea lava e fetaia'i ai ma faafitauli o le olaga, e manatua lava e le Atua, e tapena lava e le Atua sona manuia, auā e faaalua ai lava le silisili ese o le Atua

Uiga o Upu:

faalepō – miti

oge – leai ni meaai ma ni vaiinu

mau – tele meaai ma vaiinu

GALUEGA FAATINO

Fai ni fesili a lau susuga le Faiaoga, e tulituliloaina ai pea le fanau po ua malamalama i le tala. Manaia foi ae faaali mai manatu o le fanau pe aisea ua mafai ai e Iosefa ona faamatalaina miti a Farao, ae le mafai e tagata popoto o Aikupito.

PESE:

O le Atua e telē

E malosi ma mata'utia

E leai se mea e le mafai ona ia faia

Na Ia faia atumauga

Na Ia faia vaitafe

O ona foliga ua vaaia i le lalolagi

AOAOGA

- 1 Faatuatua ma faamoemoe i le Atua
- 2 E pule aoao le Atua i mea uma

3 Aua le fefe e ta'u le mea moni i tagata

ASO SA -	14 Iuni 2020
MATAUPU -	O LE LOTO TETELE O IOANE MA PETERU
SINI -	Ia malamalama tamaiti ia aua nei fefefe a ia lototetele e tautatala atu i tagata i le upu moni e pei o Ioane ma Peteru.
TUSI FAITAU -	Galuega 4: 1-22

FESOASOANI MO FAIAOGA

O Peteru ma Ioane o isi ia soo o Iesu sa mulimuli ma vaavaai i vavega na Ia faia. O lea ua afio Iesu i le lagi a ua avea ai nei i laua ma molimau ola o le Talalelei i tagata. O le tasi o vaega taua o le la molimau, o le faamaloloina lea o le tagata ua fa sefulu ma ona tupu tausaga talu ona pipili. A ona o le la molimau e uiga i le toe tu mai o Iesu Keriso ma lona mana ua mafai ai ona la faamaloloina le tagata pipili, o le mafuaaga lena o le itagia ai o i laua e ositaulaga, o taitai o le malumalu, o satukaio ma nisi o ta'ita'i o le lotu Iutaia. Na molia i laua i luma o la latou fonu, ma ua fesiligia foi Peteru ma Ioane po o le a le mana a'o le igoa foi o ai na la faia ai lenei mea? Ae na tali Peteru ua tumu o ia i le Agaga Paia, o le Suafa o Iesu Keriso le Nasareta.

Ua vaai le fonu a le lotu Iutaia i le lototetele o Peteru ma Ioane e molimau ia Iesu ua toe faatuina mai e le Atua, faatasi ai ma le tagata pipili ua faamaloloina talu mai tausaga e fa sefulu ma ona tupu o lē mafai ona savali, ona latou tuuina atu lea o i laua e o. Peitai, na toe poloaiina i laua, ia aua lava nei la toe molimau atu ma tala'i atu i tagata le toe tu mai o Iesu Keriso. A o le lototetele o Peteru ma Ioane na toe tali atu ai ma le le fefefe i luma o le fonu a Iutaia, ua tonu lava i ai laua ona la tautatala atu ma molimau atu i tagata i mea ua la vaavaai ma fa'alogi i ai e uiga ia Iesu Keriso.

O le taunuuga o le tala tamaiti, na saoloto Peteru ma Ioane auā ua leai se mea e molia ai i laua i luma o le fonu a le lotu Iutaia. La te lei solomuli foi e ta'u atu le mea moni i ai latou, auā o i laua o tagata lototetele toe le fefefe. Ua la talitonu ma le faamaoni ia Iesu Keriso, o Ia lava na te puipui ma lavea'i i laua mai le tau faifai a tagata aemaise i latou o lo o latou teena le upu moni o le Talalelei. Ua aoao mai foi i ai tatou le fanau, ia tatou loto tetele ma faamalolosi mo le Tala lelei ia Keriso. E mafai foi ona aumaia ai le loto tetele i ai tatou e tatou te onosai ai i lo tatou ola aoaoina, aemaise o nisi o taimi tatou te augatata ai a'??Ia manuia tele outou le fanau.

Uiga o Upu:

faamata'u – faafefe
 mana – malosi lilo
 le mautali – leai se tali, leiloa se mea.
 faafiti – teena
 vavao – taofi

GALUEGA FAATINO : Saili mai upu nei i le paso?

Nasareta, faafiti, Kaiafa, lototele, Ana, faailoga.

N	A	S	A	R	E	T	A
O	F	I	A	E	N	A	P
F	A	A	I	L	O	G	A
O	I	N	M	P	H	K	N
F	A	A	F	I	T	I	S
I	K	U	R	A	F	H	U
E	L	E	T	O	T	O	L

PESE : TA'U MAI TALA IA IESU

Ta'u mai le tala ia Iesu fia faalogo ai
 Mea uma na ia faia a o i lalo nei
 Mea na ia afio iai o auala ma auvai
 Tala ia Iesu, Ta'u uma mai

TELL ME THE STORIES OF JESUS

Tell me the stories of Jesus, I love to hear
 Things I would ask Him to tell me, if he were here
 Scenes by the wayside, tales of the sea
 Stories of Jesus tell them to me

AOAOGA

- 1 Aua le fefe e tautala i le upu moni
- 2 Lototele e auauna
- 3 Faamaoni i le aoga

ASO SA - 21 Iuni 2020

MATAUPU - FA'AOSOOSOGA LONA LUA

SINI - Ia malamalama le vasega, tatou te manumalo pe a tatou auauna ma mulimuli ia Iesu,ua na o le Alii le Atua tatou te auauna ma mulimuli ai.

TUSI FAITAU - Luka 4: 5-8

FESOASOANI MO FAIAOGA

O le molimau lenei a Luka e uiga i le faaosoosoga lona lua sa feagai ma le Alii o Iesu, a'o faafesaga'i ma le tiapolo i aso e fa sefulu. Ua uma le faaosoosoga muamua i meaai e lei toilalo ai Iesu, a ua naunau pea le tiapolo e saili auala e faatoilalo ai. Ua ia ave iā te Ia ma faaali i ai malo uma o le lalolagi ma o pule ma mamalu o nei malo uma, o le a ia avatu ia Iesu pe afai e ifo atu ia te ia. Ua manatu le tiapolo o se avanoa lelei lea e manumalo ai, peitai ua le o lea le finagalo o Iesu, auā e le feagai le mamalu faale-lalolagi ma le mamalu Silisili Ese o le Atua na faia le lagi ma le lalolagi.

O le tali a Iesu i le tiapolo "E te ifo i le Alii lou Atua, ua na o Ia lava e te auauna i ai," o le faailoga o le le mafai e le tiapolo ona faatoilaloina Iesu, a o le faaalia foi lea o lana Pule ma lona Silisili Ese e le feagai ma le faatauva o le tagata ma mea uma o le foafoaga. O le tagata, na faia e le Atua i lona faatusa Paia ma e ao foi la i soo se tagata ona ifo atu ma auauna i le Atua.

O le fiapule ma le manatu faasausili o le tiapolo i mea na faia e le Atua, e le oo i ai sona malosi ma lona malamalama e oo foi i le tagata, auā o mea uma o le foafoaga ua tuumatāmaga e le Atua, e tofu lava tagata, manu, laau, sami, laueleele ma lona aogā, ae le mafai, le mafai ona tatou laasia atu le pule ma le Silisili Ese o le Atua e ou mea uma.

GALUEGA FAATINO

Ia fai mai e le vasega le Tulafono 1 – 4, auā e fesootai lelei ma le upu lea a Iesu na fai i le tiapolo, “*E te ifo i le Alii lou Atua, ua na o Ia lava e te auauna i ai*” Faamatala e lau susuga lea fesootaiga ma faamalamalama i tamaiti.

PESE : O IESU E MANUMALO

O Iesu e manumalo, e manumalo, e manumalo
 O Iesu e manumalo e manumalo i taimi uma
 Manumalo x8
 Manumalo i taimi uma
 O Satani e toilalo, e toilalo, e toilalo
 O Satani e toilalo, e toilalo i taimi uma
 Toilalo x8
 Toilalo i taimi uma
 Mulimuli nei loa ia Iesu, ia Iesu, ia Iesu
 Mulimuli nei loa ia Iesu, o ia o le manumalo

A’OA’OGA

1. Aua tatou te tofotofoina le Atua
2. E malosi le mea moni
3. O tatou o auauna a le Atua

ASO SA : 28 Iuni 2020

MATAUPU : O LE AFI MAI LE ATUA

SINI -: Ia a’oa’oina tamaiti ia malamalama, aua nei galo i ai tatou le alofa tausī
 mai o le Atua.

TUSI FAITAU : Numera 11: 1-3

FESOASOANI MO FAIAOGA

O le tasi lea faafitauli tele o Isaraelu ina ua latou tuua Aikupito ae agai atu i le nuu folafolaina, o le ola muimui i lo latou Atua ma ua latou tuua’i i le Atua le tele o faafitauli o le

leai o ni meaai ma ni vaiinu e tausi ai i latou i le vao. Ua galo ia Isaraelu vavega na faia e le Atua i Aikupito ma le fa'aolataga na ia saunia mo latou ona ua latou faasili le fia aai ma le fia inu a ua galo i loto o le Atua na te mafai ona fai soo se mea latou te manana'o i ai. Ua latou muimui ma inoino i le manai na auina mai e le Atua e tausi ai i latou a ua latou manatu i meaai na o latou maua i Aikupito. A ua leaga lea mea i fofoga o le Alii ma ua tupu ai lona to'asā.

Na aumai e le Alii le afi ia te i latou ua faaumatia ai pito togālauapi. Ona tagi atu ai lea o le nuu ia Mose mo se fesoasoani, ua tatalo foi Mose i le Alii, ona pe ai lea o le afi. Sa faaigoa e Mose lea mea o Tapara, auā na mu ai le afi mai le Alii ia te i latou.

E faaalua le silisili ese o le Atua i ona tagata pe a le usitai ma fa'alogo ia te Ia. O le afi o le faaalua lava lea o le silisili o le Atua na te faaumatia ai mea leaga uma, a'o le Atua foi na te toe aveesea i lana ia pule faitalia. Ua aumaia e le Atua le afi ona ua galo ia Isaraelu le alofa o le Atua i ai latou. O se aoaoga foi lea mo tatou le fanau. Aua nei galo i ai tatou le alofa o le Atua o lo o auala mai i o tatou matua. O le toatele o nisi o tamaiti, e matutua loa ma maua manuia ma le malosia ona le ano mai lea i matua ma e matutua. Ia tatou lagona le agaga faafetai i le Atua ona o lana tausiga manuia i lo tatou ola. Ia manuia tele outou le fanau.

GALUEGA FAATINO

Tali fesili nei

- 1 O ai na fa'alogo i le muimui a Isaraelu?
Tali: O le Alii
- 2 Aisea na to'asa ai le Alii?
Tali: Auā ua muimui lona nuu ia te Ia
- 3 O le a le mea na tuuina mai e le Atua ina ua to'asa i lona nuu?
Tali: O le afi
- 4 Sa tatalo Mose i le Alii ina ia a?
Tali: Ina ia pe le afi
- 5 Faamatala mai le uiga o le igoa Tapara
Tali: O le eleele na mu ai le afi mai le Alii ia Isaraelu

PESE – Le Alii e lau Afioga (Pese ma Viiga 220)

A'OA'OGA

1. E le fiafia le Atua i le tagata ae ola muimui
2. Tatalo i le Atua pe a manaomia se fesoasoani
3. Aua tatou te tofotofoina le Alii

MANATU TAIALA O IULAI - AGAMALŪ

O le isi lea aoaoga taua sa ola ai le tele o tagata o lo o i le Tusi Paia ma sa faamanuiaina ai i latou e le Atua. E le gata ina manuia ai a latou fanau, o aiga, o nuu ae faapea foi a latou atina'e, lea foi na fetalai ai le Alii Faaola i lana lauga faaamuia i luga o le mauga, "*Amuia e agamalū auā e fai mo latou tofi o le nuu*" O le tau'i lena o le tagata e agamalū, e fai mo ia tamaoiga ma le faasinomaga o le nuu e nofo ai, o manuia e le uma, e augatupulagā, e faasolosolo i a latou fanau pe a mavae atu latou.

ASO SA - 5 Iulai 2020

MATAUPU - UA AGALELEI MOSE IA REUELU

SINI - Ia aoaoina le fanau ia latou iloa ona agalelei atu i soo se tasi o manaomia se fesoasoani auā e manuia ai o latou olaga.

TUSI FAITAU - Esoto 2: 11-22

FESOASOANI MO FAIAOGA

O lo o manino lava lena tala ma ua tatou malamalama foi i ai, i le tulaga na oo ia Mose ina ua ia fasiotia le tagata Aikupito ma natia i le oneone. O le upu moni, o le naunau o Mose e laveai le tagata Eperu mai i lima sauā o le Aikupito, ae le gata i lea o lona taofia lea o ona uso a Eperu e toalua mai le femisai, a ua avea ma ala e lamatia ai lona ola mai lima o Farao ma sola ese ai loa ma nofo i luga o se tasi o vaieli i le nuu o Mitiana. A'o le vaieli lea, e masani ona o ifo i ai afafine e toafitu o le ositaulaga i Mitiana e utu vai ai e faainu ai lafu mamoe a lo latou tama.

A ua o mai leoleo mamoe ma tutuli ia te i latou, ona tulai atu lea o Mose ma laveai ia te i latou ma faainu a latou lafu mamoe. Ua latou o atu ma faaailoa atu ia Reuelu lo latou tama le mea na tupu, ona ia aami ai lea ia Mose latou te nonofo faatasi. Mulimuli ane ua agalelei Reuelu ia Mose ina ua ia faa nofo ia te ia i lona fale ma ua ia avatu foi lona afafine o Sepora e fai mana avā.

Ua fanau mai le tama tane ona faaigoa ai lea e Mose ia Keresoma, auā ua faapea a ia, “Ua ou aumau i le nuu ese.” O Mose o se tagata agamalū, e lei avea lona sola ese mai Aikupito ina ua lamalama Farao e fia fasioti ia te ia ma ala e muta ai lona faamoemoe, auā sa tapena lava e le Atua ona manuia, ina ua avea Mitiana i le aiga o Reuelu e fai ma faavae o lona aiga tumau ma avea ai o ia ma taitai iloga o Isaraelu mulimuli ane.

O le agalelei o Reuelu na ia toe aami ai Mose ina latou nonofo ma momoe i lona fale. O le aoaoga mo tatou le fanau, ia tatou maua le agalelei i isi uso a tagata. Afai tatou te agalelei atu, e faapena foi ona toe agalelei mai tagata i ai tatou.

GALUEGA FAATINO: Faamatala

- Faamatala le galuega sa agalelei ai Mose ?
- Ao le a foi se galuega sa toe agalelei ai Reuelu

PESE: GOD IS SO GOOD

God is so good x3
He's so good to me

He took my sins x3
Now I am free x3

God is so good
He took my sins away
Now I am free
He's so good to me

E lelei o le Atua x3
E lelei ia te a'u

Ua ia ave au agasala x3
Ua ou saoloto ai nei

E lelei le Atua
Ua ia ave a'u agasal
Ua ou saoloto ai nei
E lelei ia te a'u

A'OA'OGA

1. Ia agalelei i soo se tagata
2. Aua le femisai auā e le fiafia ai le Atua
3. E saunia lava e le Atua o tatou manuia

ASO SA - 12 Iulai 2020

MATAUPU - FAAOSOOSOGA LONA TOLU

SINI - Ia aoaoina le fanau ia malamalama, tatou te le tofotofoina le Alii le Atua auā tatou te malaia ai.

TUSI FAITAU - Luka 4: 9-13

FESOASOANI MO FAIAOGA

O le faaosoosoga lona tolu lenei na feagai ma Iesu e tusa ai ma le molimau a Luka i le vaega o lana Tusi sa o tatou faitauina. Ina ua le mafai Iesu ona ifo i le tiapolo i le faaosoosoga lona lua na feagai ma Ia, ona toe ave ai lea e le tiapolo ia te Ia ma faatu i le tumutumu o le malumalu i Ierusalem ma faaoso ia Iesu ina ia oso i lalo a o le a ia poloai i ana agelu latou te tausi ia te Ia ma ave ia Iesu i o latou lima ne'i tu'ia lona vae i se maa.

A o le tali atu a Iesu i le tiapolo faapea atu “*Aua e te tofotofoto i le Alii lou Atua*” ua atagia mai ai le mamalu silisili ese o le Atua e le feagai ma se tagata, e le tofotofoina foi e se tasi. O le faaosoosoga mulimuli lea na tofotofoina ai le Alii o Iesu e le tiapolo talu ina faatoa uma ona papatiso o Ia i le vaitafe o Ioritana ona alu ese ai lea o ia seia i ai se aso. E ui o le tele o faaosoosoga na fetaia'i ma Iesu i lana galuega faale Talalelei mulimuli ane, ae o le la fesagaina lava lea ma le tiapolo ua tatou iloa ai ua le na o tagata ae ua faapea foi ia Satani ona ia le mafai ona tofotofoina le Alii Faaola auā o le Atua e pule aoao i le lagi ma le lalolagi.

O le natura lava ia o le tiapolo e taufaosooso ia i tatou. Ao se aoaoga mo tatou le fanau, ia tatou mataala, e tele taimi e faaosoosoina ai i tatou. E i ai taimi e te mana'o ai i le peni poo seevae o isi tamaiti, ona e mafaufau lea e te alu e gaioi mai..Leai. o le faaosoosoga lena a le tiapolo. Ia tatou mataala ma faamoemoe pea i le Agaga o le Atua tatou te tetee atu ai faaosoosoga e oo mai.

GALUEGA FAATINO:Faatulagaga

Faatulaga mai i le fa'asologa sa'o?

- Ona tali atu lea o Iesu, *Aua e te tofotofo i le Alii lou Atua*”
- “Afai o oe o le Alo o le Atua, ina oso ia oe i lalo i le mea nei”
- Ua faauma e le tiapolo faaososoga uma, ona alu ese ai lea ia te ia seia i se aso
- Ua ave e le tiapolo Iesu i Ierusalem ma faatu ia te Ia i le tumutumu o le malumalu

PESE - Iesu le Uo a tamaiti
 Uo a tamaiti
 Uo a tamaiti
 Iesu le Uo a tamaiti
 Ioe ioe e moni

Satani o le fili o tamaiti
 Fili o tamaiti
 Fili o tamaiti
 Satani o le fili o tamaiti
 Ioe ioe e moni

A’OA’OGA

1. Aua tatou te tofotofoina le Alii
2. Tatou te manumalo pe a tatou au faatasi ma Iesu
3. O Satani o le fili o tamaiti

ASO SA : 19 Iulai 2020

MATAUPU : UA SALAMŌ LE TUPU O AAPO

SINI : Ia malamalama le vasega, i le mafuaaga na faia ai le tupua auro ma le uiga o lea tupua auro.

TUSI FAITAU : 1Tupu 21:27 - 29 (Mo le Vasega)
 1Tupu 21:1 – 29 (Mo le Faiaoga)

FESOASOANI MO FAIAOGA

O Aapo sa fai ma Tupu ia Isaraelu ma lona toalua o Iesepela. Sa i ai le tovine a le tasi tamaloa e igoa ia Napota, e latalata ane i le maota o le tupu o Aapo. Ua mana’o ai Aapo i le tovine ma fai atu ia Napota e aumai ma ia lana tovine e fai ma ona fanua e toto ai ana laau ‘aina ona e latalata ifo i lona fale. Ae na te ave i ai se isi tovine e sili ona lelei faatasi ai ma le tupe e totogi ai le tovine.

Fai mai le tali a Napota – *“Ia faamamao e le Alii ia te au ona ou avatu ia te oe le tofi o o’u tama”*. Na lagona le le fiafia o le Tupu ona alu ai lea o Ia i lona fale ma le ita tele. Ua taoto o ia i lona moega ua faasaga ese ona mata ua le ‘ai foi. Ua iloa e lona toalua o Iesepela ona sau lea ma fesili i le Tupu po o le a le mea ua tupu. Ua faamatala i ai e Aapo lona ita ona ole tovine a Napota. Ona fai faalilolilo lea e Iesepela o le tusi e ave i alii sili o le nuu, o lo o saina ai le igoa o le Tupu. O le faamoemoe o lea tusi ina ia fasiotia Napota, ona maua ai lea e Aapo o le tovine. Na taunuu fuafuaga leaga a Iesepela ma iu ai ina fasiotia ai Napota.

Na faaali le Atua i le perofeta o Elia le Tisepi, ina alu ifo e faafetaiai ia Aapo ma ta’u i ai le feau o le tau i lona mea leaga na faia ia Napota. Fai mai le feau a Elia. *“O le mea na etoeto ai uli i le toto o Napota, e etoeto ai foi uli i lou lava toto....O Iesepela foi e ‘aina ia e uli i lalo o le pa o Isereelu.”*

Ua faalogo Aapo i le feau mai le Atua, ona saeia lea e ia ona ofu, ma ua ofu lona tino i le ie talatala, ma ua anapogi, ma taoto i le talatala ma ua fealuai faafifilemu. Ua lagona le salamo i le Tupu ona o lana mea leaga sa fai. Na alofa le Atua ma toe faamagalalo Aapo ona ua salamo faamaoni. O se aoaoga foi lea mo tatou le fanau. Ia tatou maua le loto salamo faamaoni. O a mea sese tatou te faia, salamo ma faamaualalo o tatou loto i le Atua. O le Atua e alofa mai lava o ia i ai tatou.

Uiga o Upu;

Faafifilemu : leai se pisa, le toe lagona le leo

GALUEGA FAATINO: Fesili Fetufaa’i

- Aisea na musu ai Napota e ave le tovine ia Aapo?
- Se mea lelei na fai e Iesepela?
- Faatalanoa le uiga o le feau a Elia ia Aapo e tusa o le tau i lona mea leaga?

PESE: 134 Pese & Viiga..Ou te tagi lou Tama....

AOAOGA:

1. Ia lagona le salamo faamaoni.
2. E faamagalalo i tatou e le Atua

3. Aua tatou te faufau leaga pei o Iesepela

ASO SA - 26 Iulai 2020

MATAUPU - TAULAGA A LE FAFINE

SINI - Ia a’oa’oina le fanau i le taua o le ola faitaulaga ma foa’i mea sili mo le Atua

TUSI FAITAU - Mareko 12: 41-44

FESOASOANI MO FAIAOGA

A’o i ai Iesu i le malumalu, sa nofo o Ia e feagai tonu ma le mea o lo o lafo ai taulaga a tagata, ua silafia e Ia tagata e toatele o lafo a latou tupe, ma o le toatele o i latou o tagata mauoa. Ona sau ai lea o le tasi fafine mativa ua oti lana tane ma lafo ane ai ana tupe iti e lua, o mea uma ia sa ia te ia ua ofo e fai ai lana taulaga.

Ua silasila i ai Iesu, ona Ia fetalai atu lea i ona soo ma faapea atu ia te i latou “*E moni ou te fai atu ia te outou, o mea a lena fafine mativa ua oti lana tane, ua lafo i le mea e teu ai tupe, ua sili ia i ai latou uma na lafo i ai, auā o i latou uma, ua lafo nisi mea ae tuu nisi, a’o lenei fafine mativa ua lafo uma ana mea sa ia te ia, o ana mea uma e ola ai*”

E taua le fai taulaga i le Atua i tupe, ae sili atu ona taua pe a ofo i ai ma o tatou tagata atoa i le tino, mafaufau ma le agaga. E le faapea ua faaleaogaina e Iesu taulaga a le toatele o tagata, LEAI, a’o le finagalo o lo tatou Alii, ia foai ma le loto atoatoa mea sili ua tatou maua e fai ai a tatou taulaga i le Atua, foai ma le loto maulalo e pei o lenei fafine mativa, ua ia tuuina atu lona tamaoiga sa ia te ia, ma lona ola atoa e auauna ai i le Atua, faitalia le Atua ma tausi ia te ia ma lona aiga.

Uiga o Upu:

kotane – o le tupe apa laititi

vao tagata – tagata e toatele

GALUEGA FAATINO :Mategā tupua:

- O a’u sa ou nonofo i totonu o le malumalu i le taimi na gasolo mai ai tagata e lafo a latou taulaga.....Tali: Iesu
- Fai mai Iesu e sili la’u taulaga i tagata uma ona ua ou lafo mea uma ou te ola ai.....Tali: Fafine mativa
- O matou lea na fetalai mai ai Iesu i le fuaiupu e 43-44.....Tali: Soo o Iesu
- O le uiga o lo’u igoa “o le tupe apa laititi,” o ai la a’u?..... Tali: Kotane

PESE - Pese 158 (Pese ma Viiga)

A’OA’OGA

1. Foaia mea sili mo le Atua
2. E alofa Iesu i soo se tagata
3. Aua e te vaai maualalo i le isi tamaititi

MANATU TAIALA AUKUSO : TAMA OLA GALUE

O le masina lena e tatou te faamanatuina ai le sao taua o Tamā. O le a agai ai tatou mataupu i nisi o Tamā o le Tusi Paia e aumaia ai ni aoaoga lelei mo tatou le fanau. O Tamā lava ia ua faaupuina o Ulu o aiga Samoa. O lana taitaiga e faalagolago tele ai le manuia ma le ola solo lelei o aiga, nuu ma Ekalesia.

ASO SA: 2 Aokuso 2020

MATAUPU: O IUTA LE SEKARA

SINI: Ia aoaoina le fanau ia malamalama, e le lelei le gaoiga a Iuta sa fai.

TUSI FAITAU: Mareko 26:14-16

FESOASOANI MO FAIAOGA:

Faatalofoa atu ia te outou le fanau i le nei taeao fou. O Iuta o se tasi lea o o so'o o Iesu, mai ona soo e sefulu ma le lua. Sa taupulepule pe sa manatu le au ositaulaga e sue se mea e maua ai Iesu. Ona alu atu ai lea o le soo lenei o Iesu, ua faapea atu i le au ositaulaga. – “*Se a le mea tou te aumaia ma a'u, ou te faalataina ai o ia ia te outou?*” Ona avane ai lea e le au ositaulaga o tupe e tolu sefulu ia Iuta. Ioe Tamaiti! Talu mai lava le aso na ave ai nei tupe ia Iuta, o le aso lava lena na amata ai ona lamalama ai e Iuta se aso e faalata ai ia Iesu.

Ua tatou iloa uma lava, sa taunuu lava fuafuaga leaga sa faia e Iuta. Ao le fesili mo tatou – Se mea lelei sa faia e Iuta ia Iesu? Ioe! E leaga le fuafuaga a Iuta sa ia faia mo lona matai o Iesu. Ua ia manao i le tupe sa tuuina i ai e le au ositaulaga, ae ua le sili lona alofa i lona matai sa la mafuta i le tele o aso.

Ia o le tatou mataupu lena i lenei taeao. O le aoaoga mo tatou, aua le avea le tupe ma mea tatou faia ai se mea sese. O le tupe o se mea e aoga i ai tatou, ae aua nei faia ma auala e faatino ai se mea le lelei. Ia tatou maua le ola fealofani, ae aua tatou te taulamalama i isi o tatou uso a tagata. Ia manuia tele outou le fanau.

Uiga o Upu:

Faalataina: faapoto, taumafai i se auala e latalata mai ai lesi tagata ae ese le uiga o lo o mulimuli mai.

Lamalama : saili se auala e maua ai.

GALUEGA FAATINO: Taliga Fesili

1. O ai Iuta le Sekara?
2. O le a le upu a Iuta na fai i le au ositaulaga?
3. E fia tupe na ave ia Iuta?
4. Se gaioiga lelei na faia e Iuta?

Tali: 1. O le soo o Iesu.
 2. *Se a le mea tou te aumai ma a'u, ou te faalataina ai o ia ia te outou?*
 3. E tolugafulu tupe
 4. *...tatala le avanoa i fanau mo manatu faaalua.....*

PESE:

WORK TOGETHER

When we all work together, together, together
 When we all work together, how happy we'll be

For your work is my work
 And my work is God's work
 When we all work together

How happy we'll be

Afai tatou te galulue faatasi, faatasi, faatasi
Afai tatou te galulue faatasi ona fiafia ai lea

O la'u galuega , o lau galuega
Tatou galulue mo le Atua
Afai tatou te galulue faatasi
Ona fiafia ai lea

A'OA'OGA:

1. Aua le ola taulamalama.
2. Aua le sailia tupe i se auala leaga.
3. Ia maua le ola fealofani.

ASO SA : 9 Aokuso 2020 (Aso Sa o Tama)

MATAUPU : UA USITA'I LOTA

SINI : Kenese 19:1-25

TUSI FAITAU: I malamalama le vasega o le usitai o Lota i le Atua na faasaoina ai o Ia ma lona aiga, mai le malaia na o'o ia Sotoma ma Komoro.

FESOASOANI MO FAIAOGA:

Talofa Tamaiti, o a mai tatou i lenei taeao?. O le tatou mataupu o lenei taeao, e faatatau i le toeaina lenei o Lota. O ai foi Lota tamaiti? O Lota o le atalii o le uso o Aperaamo. O Lota ma lona toalua ma lana fanau teine e toalua sa nonofo i le nuu lea o Sotoma ma Komoro. Fai mai le tala o le nuu nei o Sotoma ma Komoro, na o'o i luma o le Atua lo latou ola agasala.

I se tasi o afiafi ao nofononofo Lota i le faitotoa o le pa o le nuu o Sotoma, na alu ane ai le agelu a le Atua ia te ia, ona ifo toele ai lea o ia ia te ia. Na fai atu foi o ia i nei tagata e toalua (agelu), ina ia latou o ane i lona fale sei malōlō ai. Na iloa e fitafita o Sotoma ma Komoro nei tagata e toalua, ona latou omai ai lea ma siomia le fale o Lota, ma valaau ia Lota ina ia tuli mai i fafo nei tagata e toalua. Fai mai le tala tamaiti – na faatauasoina mata o nei tagata ma latou le iloa ai i latou.

Ona faatonuina ai lea e agelu o Lota, ina ia tulai ma lona toalua ma ona afafine ma sosola i se aai o lo o lata ane i le mauga. O le igoa o lea aai o Soara, o lona uiga o le itiiti. Ua fai atu Lota i agelu o le aai e latalata mai ia Sotoma ma Komoro ma e laitiiti foi. Na tali manino le Atua, e na te le faaoo le malaia i lea aai. O le faatonuga lea a le Atua na usitai ai Lota ma lona toalua ma lana fanau. Faimai ua latou sosola ese ma Sotoma ma Komoro ae auina ifo loa e le Atua le teio ma le afi mai le lagi ma faaumatia ai loa Sotoma ma Komoro.

Ia o le tatou tala lena tamaiti – Na faasaoina Lota ma lona aiga ona o le usitai i le faatonuga a le Atua. Ua faasalaina Sotoma ma Komoro ona ua agasala i luma o le Atua. Ao Lota ma lona aiga sa usiusitai pea i le Atua. O se aoaoga foi lea mo tatou le fanau – Ia tatou ola usiusitai i le Atua ma lona fingalo ona faasaoina ai lea o tatou mai le tele o faafitauli e tutupu i lo tatou ola tuputupu a’e. O le ola usitai e manuia ai o tatou olaga. Ia manuia tele outou le fanau.

Uiga o Upu:

Faaumatia : faaleagaina, fasiotia
 Faatotō faaua: toulu ifo pei o le timu
 Teio ma le afi: o le afi ua potopotoi

GALUEGA FAATINO: Taliga Fesili

1. O ai Lota e pei ona ta’ua i le tala?
2. O le a se mea na tupu i tagata Sotoma ma Komoro ia na o atu i agelu a le Atua?
3. O le a le uiga o le upu Soara?
4. E toafia le fanau a Lota?

Tali: 1. Atalii o le uso o Aperamo, 2. Faatauasoina mata, 3. O le itiiti, 4. E toalua teine.

PESE: Faalogo ma Usitai e leai se isi ala.....

AOAOGA:

1. Faalogo ma usitai i matua
2. Aua tatou te pelogia o tatou matua
3. E silasila le Atua i le tagata agasala.

ASO SA : 16 Aokuso 2020

MATAUPU : IONA I LE MANAVA O LE I'A

SINI : Ia aoaoina le fanau ia malamalama – o le iai o Iona i le manava o le ia na ia tatalo ai i le Atua.

TUSI FAITAU: Iona 1:12 – 2 :10 (Mo le Faiaoga)
Iona 2:1 – 10 (Mo le Vasega)

FESOASOANI MO FAIAOGA:

O ai foi lea na folo e le ia?. Ae fia foi po na iai Iona i le manava o le ia?. (*O fesili masani ia e manaia foi ae amata ai le mataupu mo le fanau. O le tusi faitau o loo amata mai ina ua lafo Iona i le sami*). O Iona tamaiti, sa le faalogo ma usitai i le faatonuga a le Atua ina ia alu i Nineva, a ua alu i le vaa e alu i Tasesa. O le ala foi lea na sousou ai le sami ao alu le vaa lea na alu ai Iona i Tasesa.

Fai mai le tala ua iloa lelei e Iona o Iona le usitai i le Atua lea ua tuputupu ai pea le sousou. Ona ia faiatu lea ia te i latou ina ia sii o ia ma lafo ifo i le sami. Ioe Tamaiti, ana le lafoina Iona i le sami e le te'a le sousou o le sami. Na lagona le popole o nei tagata ona o la latou gaioiga na faia ia Iona, peitai sa finagalo lava i ai le Atua ina ia aveese mai Iona mai le vaa ina ia alu lava i Nineva. Na tupu tele le faatuatua o tagata o le auvaa ona o le mana ofoofogia o le Atua ma le vave na malū le sami ona o le finagalo o le Atua mo Iona.

Ia o le tala tamaiti na faatonuina e le Atua le i'a, lea sa alu atu ma folo le tama o Iona. E tolu po e tolu foi ao sa iai Iona i le manava o le ia. Ao iai la Iona i totonu o le manava o le i'a tamaiti, faimai sa tatalo ma faatoese Iona i le Atua ona o puapuaga ua oo ia te ia ona o Iona le usitai i le faatonuga a le Atua.

Mo le Faiaoga - (F3 – f9) – o upu na o le tatalo a Iona na tatalo ai ao i ai i totonu o le manava o le i'a. E fai si loloto o upu o le tatalo a Iona ae taumafai lava ia faafaigofie i tamaiti – E manaia foi ae fai faa-suesuega i tamaiti...FF: f3 Na e lafoina a'u i le moana i totonu lava o le sami, na siosiomia au e le au....Aua o le tala o tagata o le auva'a na lafoina Iona i le sami, ao sina mataupu silisili faigofie e faasoa i fanau. Ia iloa e Tamaiti na iloa lelei e Iona o le Atua na tupu ai le sousou o le sami. O le Atua foi na musumusuina tagata nei e lafo Iona i le sami.

Peitai o le aotelega lava ia o le tatalo a Iona i totonu o le manava o le i'a, o le tatalo a le tagata ua lagona le salamō ma le faatauvaa ina ua ia fetaia'i ma faafitauli. O totonu o le manava o le ia tamaiti, o se nofoaga e pogisa, o se nofoaga foi e faigata ona ola ai se tagata i aso e tolu. Ae aisea na ola ai pea Iona tamaiti???(*O se fesili e lui ai le faalogo o tamaiti i le tulagaese o le iai o Iona i*

le manava o le i'a, e faigata le fesili ae tuu atu pea i lau Susuga le Faiaoga e ave pea i le fanau, o le vaega lea e tau tulituli, o le mana laveai ma le mana silisili ese o le Atua). O le mana laveai o le Atua lea na ola ai pea Iona i totonu ole manava o le ia. O le nofoaga lea na ia tatalo faatoese ai i le Atua ona o lona le usitai

Ia o le tatou tala lena tamaiti – o se aoaoga lelei foi mo tatou. Ia tatou maua le ola usiusitai i le Atua e ala atu i o tatou matua ma e matutua, auā afai tatou te le usiusitai i le Atua, o le a mautinoa lava e feagai i tatou ma ni faafitauli. Afai foi tatou te iloa ua tatou sesē i lo tatou va ma le Atua. Ia tatou lagona le salamō ma faatoese i le Atua. O le Atua lava ia o le Atua loto faamagalō, o le Atua e alofa. O le alofa o le Atua na ia aumaia ai lona Alo pele e maliu mo oe ma a'u ma i tatou uma.

Uiga O Upu:

Matatau :	fefe
Puapuaga:	mafatiaga
Limu:	limu o lo o maua i le sami
Anaana:	usiusitai

(Nb): Lau Susuga, o le limu o lo ta'ua o lo o faamatala ai le i ai o Iona i le sami ma le manava o le i'a)

GALUEGA FAATINO: Fesili

1. O le a se mea e tataua ona fai pe a tatou faia o se mea sese?
2. O le a le gaoiga a Iona sa faia i totonu o le manava o le ia?
3. Ao le a le tatalo?

(O fesili ia e faatalanoa ai le mataupu, e leo i ai ni tali maumaututu, ao le faamoemoe ia faatalanoa le fanau)

AOAOGA:

1. Ia tatou ola usiusitai
2. Aua tatou te fiafia e sosola
3. Ia tatou maua le ola salamo ma faatoese i le Atua

ASO SA : 23 Aokuso 2020

MATAUPU : UA FAAU'UINA TAVITA MA TUPU

SINI : Ia malamalama le fanau ia malamalama na filifilia e le Atua Tavita e avea ma tupu ia Isaraelu ina ua oti Saulo.

TUSI FAITAU: 2 Samuelu 2:1-4

FESOASOANI MO FAIAOGA:

Talofa Tamaiti? Ia o le tatou tala i lenei taeao o le tala i le faauuina o Tavita e avea ma tupu o Isaraelu. Ua faalogo Tavita ua maluu si toaina o Saulo sa fai ma Tupu ia Isaraelu, ona faanoanoa ai lea o Tavita. Peitai o lea ua taunuu ai valoaga ua leva ona valoia e le Perofeta o Samuelu, o le a avea Tavita e fai ma tupu ia Isaraelu.

O le mea faigata tele ua tupu ia Isaraelu, ua tele ina nofoia e tagata Filisitia laueeleele o Isaraelu. Aua o Filisitia lea na faiaina ai Isaraelu ma latou fasiotia ai ma Saulo. I manatu o Isaraelu ua nao Tavita lava le tagata ua tatau ma onomea i le taitaiina o le nuu o Isaraelu. O ia o le tagata o le a toe mamalu ai Isaraelu.

Ua fesili Tavita i le Atua pe tatau ea ona ia alu a'e i se aai o Iuta. Ona tali atu ai lea o le Atua e tatau ona alu a'e i le aai o Heperona. Ona tulai ai lea o Tavita ma lona aiga ua o a'e i Heperona. O ia atoa ma ana ava e toalua o Ainoama le Iserelu ma Apikaila le ava a Napalu le Karamelu. Ua o atu i latou ma lona aiga atoa ma taitasi ma nonofo i aai o Heperona. Ao nonofo ai Tavita ma lona aiga i Heperona, ona omai ai lea o tagata Iuta ua latou faauu ia Tavita e fai ma tupu o le aiga o Iuta. O le mea muamua lava na fai e Tavita ina ua avea o ia ma Tupu, sa ia fai le faafetai ia Iapese Kiliata ona o lo latou agalelei ia Saulo ma ona atalii ina ua latou ave o latou ivi nai pa o Petesani ma tuu i lalo o le laau tele i Iapese.

O le tulai mai o Tavita e fai ma tupu ia Iuta o le finagalo lava lea o le Atua mo ia. Ina ia faaola Iuta atoa ai ma Isaraelu uma. Ao le faauuina ai o Tavita e fai ma tupu, o le faamoemoe ua leva ona tofia i ai e le Atua ao laitiiti.

Ia o le tatou tala lena – o se aoaoga lelei foi mo tatou le fanau. E filifilia i tatou e le Atua pe a tatou tama lelei ma teine lelei. E tofia i tatou e le Atua e fai ma taitai i le lumanai, ae le gata i lea o soo se feau e finagalo ai le Atua mo tatou. O Tavita o le tama sa usitai i lona Tama ma le Atua. Ia toaaga i le Aoga aso Sa ma le lotu e manuia ai o tatou olaga mo le lumanai. Ia manuia tele outou le fanau.

Uiga o Upu:

Faauu: tofia, filifilia

GALUEGA FAATINO: PASO

Saili mai upu nei i totonu o le paso?

Heperona, Iuta, Tavita, Ainoama, Apikaila,

A	P	I	K	A	I	L	A	O	U
E	I	O	U	G	U	P	M	M	P
S	A	F	K	L	T	N	A	G	A
T	A	V	I	T	A	E	O	S	A
F	O	U	N	M	A	S	N	E	O
U	T	F	K	L	A	O	I	U	L
A	P	I	K	A	I	L	A	M	N
A	S	O	P	M	M	N	E	F	L

PESE: HAKA

O Tavita o le tama na filifilia

E sui ia Saulo ua fasiotia

Taunuu valoaga na valoia

Tupu o Israelu, ina ia manuia.....Heeee

AOAOGA:

1. E tofia i tatou e le Atua i ana feau
2. E faaeaina le ola usiusitai.
3. Ia tatou manatua le Atua pe a faaeaina

ASO SA : 30 Aokuso 2020

MATAUPU : O SAKAIO

SINI : Ia malamalama le fanau o Sakaio le ao lafoga na valaauina e Iesu la te o i lona fale.

TUSI FAITAU: Luka 19: 1-10

FESOASOANI MO FAIAOGA:

Tamaiti – O ai foi na a’e i le laau? Ioe o Sakaio..Aisea na a’e ai Sakaio i le laau??. (*O nisi foi ia o fesili masani a finagalo i ai le Faiaoga e mafai foi ona amata ai le mataupu ina ia aumai ai le faalogo a tamaiti*). O Sakaio tamaiti, o ia o le ao lafoga. O le ao-lafoga i manatu o tagata Iutaia, o le tagata agasala, ona e manatu o e ao lafoga ua latou ao faasili lafoga a tagata. (*Toe faamatala le uiga o le ao-faasili*). O le ao faasili tamaiti – o lona uiga ua ova atu tupe a tagata e totogi nai lo le tau sa’o e tatau ona totogi ai a latou lafoga.

Fai mai le tala ao faagasolo pea le galuega a Iesu, ona oo atu lea o ia i le aai o Ieriko. Ona gasolo ane ai lea o le motu o tagata ia te ia. Ae na alu ifo ai ma le tagata lenei o Sakaio le ao lafoga, o ia foi o le tagata mauoa. Ua fia vaai o ia ia Iesu ae peitai ua le mafai ona ia iloa atu Iesu ona o le motu o tagata e toatele, ao ia foi o se tagata e puupuu. Ona momo’e lea o Sakaio i luma o lo o i ai le laau o le Sukamoru, ona ia a’e ai lea i luga sei ona iloa atu ai Iesu. Ua oo atu Iesu i le vaega o lo o i ai le laau, ona ia iloa ai lea o Sakaio o lo o i luga o le sukamoru. Ona fetalai atu ai lea o Iesu ia Sakaio, “*Sakaio e ia e vave ifoifo ia i lalo, aua e tatau ona ou i lou fale i le aso nei..*” Ioe tamaiti, ona vave alu ifo ai lea o Sakaio i lalo ma le sukamoru. Ua faalogo ai le toatele o tagata na latou iai faatasi ma Iesu ona latou tomumu ai lea ona o le fetalaiga a Iesu ia Sakaio. Faimai nei tagata – “*Ua alu o ia i le tagata agasala..*” Manatua Tamaiti o le manatu o tagata ia Sakaio o le tagata agasala.

O Sakaio foi o le mauoa ia, na lagona le fiafia o Sakaio ina ua amanaia o ia ma lona aiga e Iesu. Le ala lea na ia faapea ai – *Ua oo mai le faaolataga i le aiga nei i le asō...* Ua fai atu Sakaio ia Iesu – o le a ia vaeluaina le tele o ana oloa mo e matitiva, afai foi na faagaoni ona aumai se mea, o le a ia tau ai taifa. Ua lagona e Sakaio le pai mai o le faaolataga ma le tala lelei ia Iesu Keriso. Ua lagona le salamo ma ua ia tautino lona ola e tautua ai le tala lelei a Iesu Keriso.

Ia o le tatou tala lena tamaiti e uiga i lenei tagata puupuu o Sakaio. Ua aoao mai foi ia i tatou le fanau – Aua tatou te avea ni mea i se auala faagaoni pei ona faia e le ao lafoga o Sakaio. Ia tatou saili foi ia Iesu e pei ona saili ai lenei tagata pupuu o Sakaio, lea lava na iu ai ina a’e i le laau o le sukamoru. Ae le gata i lea tamaiti – e talia i tatou e Iesu pe a tatou salamo faamaoni. Ia manuia tele outou le fanau.

Uiga o Upu:

Maimoa: matamata

Saasaa: puupuu

Sukamoru: igoa o le laau
 Vaeluaina: faasoa atu ma le isi tagata

GALUEGA FAATINO: Taliga Fesili

1. Aisea e ta'ua ai tagata ao lafoga o le tagata agasala i manatu o Iutaia?
2. Aisea na a'e ai Sakaio i luga o le Sukamoru?
3. O fea le nuu lea sa tupu ai le tala ia Sakaio?
4. O le a se mea taua na maua e le aiga o Sakaio ?

PESE: SAKAI O LE TAGATA PUUPUU SA'ASA'A

Sakaio se tagata puupuu saasaa, le tagata puupuu saasaa
 Sa a'e o ia i le sukamoru, i tafatafa o le auala
 O Iesu ua afio mai, tu loa ma fetalai
 Sakaio, alu ifo nei i lalo
 Sau ta o i lou fale
 Ua tele lou fia ulavale.....

AOAOGA:

1. Aua tatou te avea ni mea i se auala faanānā.
2. Tatou saili ia Iesu Keriso.
3. E talia i tatou e Iesu pe a salamo faamaoni.

MANATU TAIALA O SETEMA : FANAU O LE TOFI

O fanau ua faalupeina o le tofi mai le Atua. O le meaalofa ua aumaia e le Atua e faatagataina ai o tatou aiga, nuu, ma le Ekalesia. O le lumanai e ao ona tatou tausii, aoao, ma faapelepele aua oi latou ia e faaauaua le Tala Lelei ia Keriso Iesu.

ASO SA : 6 Setema 2020 (Aso Sa Tala Lelei)

MATAUPU : TA'U ATU E TINA LE TALA LELEI

SINI : Ia malamalama le fanau, o Tina o latou ia na latou muamua iloa le tala lelei e ala i le toetu mai o Iesu Keriso mai le tuugamau.

TUSI FAITAU: Mataio 28:1 - 10

FESOASOANI MO FAIAOGA:

Talofa Tamaiti? O le aso foi lenei lea e faamamaluina ai e le Ekalesia le taunuu mai o le Tala Lelei i Samoa nei. O ai foi lea na aumaia le Tala lelei i Samoa??(*O se fesili o le tala faasolopito e taua foi mo le silafia o le fanau ao lei faamatalaina le mataupu*).

O le tatou tala la i lenei taeao – o le Tala i tina na latou aumaia le tala ua toetu manumalo lo tatou Alii Faaola o Iesu Keriso. Ina ua tafa ata o le uluai aso ina ua mavae le sapatu, ona o atu ai lea o Maria le Makatala ma le isi Maria e asi le tuugamau o Iesu. Na o atu pea nei tina ma talatalanoa po o ai o le a ia fulieseina le maa mai le gutu o le tuugamau ona e fai lava si mamafa o le maa. O le tala fai mai na to le mafuie tele ona alu atu ai lea o le agelu ma tulei ese le maa mamafa mai le gutu o le tuugamau. Ua savavali atu pea tina nei, ma sa faateia i laua ina ua latalata atu i le tuugamau ma iloa ai, ua leai se maa sa i le gutu o le tuugamau.

Ua taamomoe atu nei tina ma iloa ai le tagata ua ofu papa’e o loo nofo mai i luga o le maa. Ua fefefe i laua - A ua fai atu le agelu ia i laua, e aua le fefefe .. “*Aua ua lua te matatau . aua ua ou iloa ua oulua sailimai Iesu le na faasatauroina..E leo iinei o ia, aua ua toe tu mai o iapei ona fetalai atu ai o ia...*” Ona faatonuina lea oi laua e le agelu ina ia la o atu ma ta’u atu i soo o Iesu. Na tamomoe fiafia nei tina ma le tala fiafia ua toetu Iesu..Ae na faateia i lau ina ua faali ifo i ai Iesu i le ala...Ua fai atu Iesu i ai laua – *Si o’u alofa..*Ona o ifo ai lea oi laua ua fetagofi i vae o Iesu ma ifo atu ia te ia, aua e moni lava ua toetu Iesu.

Ona fai atu ai lea o Iesu ina ia la o atu ma ta’u atu i ona soo, ina ia latou o atu i Kalilaia latou te iloa ai o ia. Ioe o le tala fiafia lea na ta’u atu e nei tina. O le Tala lelei ua toetu le Alii o Iesu Keriso. O le Tala foi lena lea tatou te faamanatu i lenei aso. O le Tala i le Toetu, o le tala o le manumalo o Keriso mai le oti ma le tuugamau. O le tala e tupu ai le faatuatua o le Au Kerisiano. Ua aoao mai foi i ai tatou le fanau ia tatou manatua le maliu o Keriso ona o oe ma a’u. O le Tala lelei lea o lo o tupu ai lo tatou ola faatuatua. Avea o tatou tamaiti ma tamaiti e o atu e ta’u atu le tala lelei i tagata. Ae aua le fiafia tatou e o atu e ta’u atu isi tala e leaga ai le isi ou uso..Ia tatou fiafia e talai le tala lelei o le toetu manumalo o Keriso..Ia manuia tele outou le fanau.

Uiga o Upu:

Sinasina: pa’epa’emā
Tetemu: fefe

GALUEGA FAATINO: Faatino le Tala..Amata atu ina ua o tina e asi le tuugamau, seia faaali ai le Alii.

PESE: Ta’u mai nei Tala Lelei..Tala Lelei naua...

AOAOGA:

1. Ua toetu Iesu
2. Avea i tatou ma e ta’u atu le tala lelei
3. Aua tatou te faitatala

ASO SA : 13 Setema 2020

MATAUPU : O SAMASONI LE TAMA MO LE ATUA

SINI : Ia aoaoina le fanau ia malamalama o Samasoni o le tama ua vavaeeseina mo le Atua.

TUSI FAITAU: Faamasino 13:1 – 5, 24-25

FESOASOANI MO FAIAOGA:

O le tatou tala i lenei taeao Tamaiti, o le tala i le tama lenei o Samasoni. Faimai le tala – o le tasi tagata e igoa ia Manoa, e tupuga mai o ia i le ituaiga o Tanu. Ua leva ona nonofo lenei tamaloa ma lona toalua e lei maua lava se la tama (*pa*). Sa faaali le agelu i le fafine le toalua o Manoa ma faapea atu – “*Faauta mai, o oe e pa. e te lei fanau, o le a e to ma fanau se tama tane...*”

O le faamanuiaga ua folafola e le Atua mo Manoa ma lona toalua o le a fanau se tamatane. O le tama lea sa faaigoa ia Samasoni. Na poloai foi le agelu i le fafine ina ia aua nei inu i se ava oona poo se mea leaga. A fanau mai foi le tama o Samasoni, aua foi nei inu o ia i se ava oona, aua foi nei oo se tafi i lona ulu. O faailoga ia tamaiti o le tagata ua ofoina mo le Alii, poo le naseri a le Atua. Sa taunuu lava folafolaga a le agelu sa faia ia Manoa ma lona toalua.

Fai mai ua fanau mai le tamatane, ua tupu le tama ma ua famanuia i ai le Atua. Sa sili lona malosi i tagata uma lava i Isaraelu ma Filisititia. O le Tama lea o Samasoni sa fatoilaloina le malosi o Filisititia. Ua tulagaese le malosi o Samasoni ona o le tama ua vavaeeseina e le Atua mo se faamoemoe lelei. O ia foi lea sa avea ma Faamsino ia Isaraelu.

Ioe Tamaiti, e faapena foi i tatou – Ua iai le faamoemoe lelei o le Atua mo i tatou i le lumanai, e faaaogaina i ai lo tatou malosi i soo se feau e finagalo le Atua tatou te galulue ai. O se aoaoga lelei foi mo tatou le fanau. Ia tatou faamoemoe ma faalagolago i le Atua o ia e na te tofia i tatou mo ana feau.

Uiga O Upu:

Naseri : o le ua vavaeeseina mo le Atua

Faagaetia: fiafia

GALUEGA FAATINO: Faatumu avanoa oi lalo i upu nei:

Samasoni, fafine, fanau, faamanuia, tamatane.

Ona _____ mai lea o le _____ o le _____ua faaigoa ia te ia o _____. Ua tupu le tama ua _____ i ai le Alii.

PESE: O au leni o Samasoni

O le toa malosi

Faamaoni loto tele

Malosi sa tulagaese

Samasoni e malosi

Le Atua na ia totofi

Faamasino i le nuu

Malosi mai lona laulu....(fati..viva la kamupani....)

AOAOGA:

1. O tatou o tagata ua vavaeesina pe a tatou faatuatua faamaoni
2. Faamoemoe i le Atua.
3. E aumai e le Atua le malosi sili

ASO SA : 20 Setema 2020

MATAUPU : O IESU I LE FALE O LONA TAMĀ

SINI : Ia malamalama le fanau o Iesu o le Alo o le Atua.

TUSI FAITAU: Luka 2:41 - 52

FESOASOANI MO FAIAOGA:

Ina ua uma ona peritomeina o Iesu ona o ai lea ma ona matua i Ierusalem ma le tausamiga o le paseka e pei ona faamanatuina i lea tausaga ma lea tausaga. O le sefulu ma le lua ai lea o tausaga o Iesu. Ua uma le tausamiga o le paseka, ona foi mai ai lea o Iosefa ma Maria ae nofo ai pea Iesu i Ierusalem, e lei iloa e ona matua. Sa manatu Iosefa ma Maria o lo o i ai Iesu i le latou aumalaga. Ina ua uma le po e tasi ona la saili ai lea ia te ia i o la aiga ma e latou te masani, ona ua la fiu e vaai e leai se Iesu.

Ona toe foi ai lea o Maria ma Iosefa i Ierusalem e saili ai Iesu. Ina ua uma aso e tolu ona la maua ai lea o ia o lo o i le malumalu, o lo o nofo i totonu o le au aoao o lo o faalogologo ia te i latou ma tau fesili ia te i latou. Fai mai Tamaiti – ua matua ofo uma lava e na faalogo ia te ia i lona potu ma ana upu e tali. E o’o lava foi i ona matua o Iosefa ma Maria na lagona foi lo laua ofo,. Ona o atu ai lea o lona tina ia te ia ma faiatu ia te ia – *La’u tama e, se a le mea ua e faapea mai ai ia te i maua Faauta o i maua ma lou tama sa ma saili lava ia te oe ma le tiga.* Ona fai atu ai lea o Iesu ia te i laua – *Se a le mea na oulua saili mai ai ia te a’u? Lua te le iloa ea e tatau ona ou i le fale o lo’u tama...?Fai mai le tala – A ua le lagona e i laua le upu na fai mai ai o ia ia tei laua... (taua le faamatala o le uiga o lea faaupuga i se gagana faigofie)* O lona uiga e lei malamalama Iosefa ma Maria i le tali lea a Iesu.

Ua latou foi ifo i lo latou nuu o Nasareta, ua tupu le potu ma le tino o Iesu. Ua alofagia o ia e le Atua atoa ma tagata. Ao Maria ua na teu mau i lona loto uiga o upu a Iesu na ia tali atu ai i ai laua. O le tala lona tamaiti – o se aoaoga mo tatou – Ia tatou toaaga e o i le fale o le Alii, poo le falesa. Toaaga e omai i le Aoga Aso Sa ma le lotu. Ae le gata i lea ia tatou toaaga e auai i faigalotu i o tatou aiga i afiafi taitasi. O le i ai o Iesu i le fale o lona tama – o le faailoga o le mafuta o Iesu i le Atua, faapena tatou ia tatou toaaga e mafuta i le Atua. Ia manuia tele outou le fanau.

Uiga o Upu :

Tausamiga o le paseka : O le ‘aiga e faamanatuina ai le faasaoina e le Atua o Isaraelu i Aikupito (*faalautele e lau susuga le faiaoga*)

GALUEGA FAATINO: Taliga Fesili

1. E fia tausaga o Iesu i le taimi tonu lea na o ai i Ierusalem i le paseka?
2. E fia po o le malaga faatoa iloa e Iosefa ma Maria e le’o auai Iesu i le malaga?

3. E fia aso na saili ai Iesu i Ierusalema ae maua e ona matua?
4. O le a le tali a Iesu i ona matua ina ua faiatu lona tina ia te ia ua la fiu e saili o ia?

PESE: Tatou o, tatou o i le fale o le Alii

I luga o le mauga x2,e matua maua luga

E aoao ai e aoai ai,e tusa ma ona ala

Ina ia matua aoaoina ai o tatou olaga....(fati twinkle, twinkle little star...)

AOAOGA:

1. Tatou toaaga i le lotu ma le Aoga Aso Sa
2. Mafuta i le Atua i taimi uma.
3. Saili ile Atua e manuia ai.

ASO SA : 27 Setema 2020

MATAUPU : ARETO E LIMA MA I'A E LUA LAU

SINI : Ia aoaoina le fanau ia malamalama e faia e Iesu vavega tetele

TUSI FAITAU: Ioane 6:1- 14

FESOASOANI MO FAIAOGA:

O areto e lima, ma i'a e lua lau – (*Manaia ae fai ai sina suesuega faigofie e ala i le faitauga o mea Samoa, lea e i ai ma i'a e faaaogaina ai le lau..e aoga foi mo le fanau...lua lau, tolu lau,,,lauagafulu...)*

O le tala o lenei taeao tamaiti, o le tala i fafagaina o tamaloloa e 5000 e le faitaulia ai fafine ma tamaiti. Fai mai ua oo ina taugagaifo le la ao lo o i ai pea Iesu ma ona soo ma le motu o tagata i le vao. Ua fesili Iesu ia Filipino – “*O ifea tatou te faatauina mai ai ni areto ina ia aai ai i latou nei?*” A ua tuu e Iesu lenei fesili ina ia tofotofo ai ia te ia, a ua silafia e ia le mea o le a faia. Ona tali mai ai lea o Filipino – “*E le lava areto pe a faatauina i tenari e luaselau ina ia tofui i latou ma sina mea itiiti,*” Peitai na fai ane le isi so'o o Aneterea lona igoa – “*O lo o iinei le tama o ia te ia areto karite e lima ma nai i'a iti e lua lau; ae auma ea ia mea i ai latou e toatele?*”

Ua faatonuina i latou e Iesu ina ia taotoo tagata i le mutia ma le fanua laugatasi. O le aofai o i latou e 5000 o tane ae le faitaulia ai tamaiti ma fafine. Ona tago lea o Iesu i areto ua faafetai ma tofitofi ona tufatufa lea i e taotoo. UA faapea foi i i'a ua avatu faitali i latou. Ua maoona lava i latou ona fetalai ane lea o ia i ona soo, ia faapotopoto toe 'aiga nei i ai se mea e māumau. Ona faapotopoto ai lea o toe 'aiga ma ua tutumu ai ato e sefulu ma le lua. Ioe tamaiti - e nao le lima areto ma ia iti e lua lau, ae ua tutumu ai ato e sefulu ma le lua i toe 'aiga. O se vavega ofoofogia na faia e Iesu.

Ia o le tatou tala lena – o le a la se aoaoga mo tataou?. Ioe, ia tatou talitonu ma le faatuatua e faia e le Atua vavega tetele i lo tatou ola. Aua tatou te popole tele i mea e 'ai aua e foai mai lava e le Atua meai mo tataou i lea aso ma lea aso. Toatele tatou le fanau e le fia o i aoga pe a leai se lunch a??? Aua tatou te naunau i le ai faaletino, a ia naunau i tatou i le aai faaleagaga. Ia manuia tele outou le fanau.

Uiga o Upu:

Tenari: ta'u na ta'u ai tupe i aso ia

GALUEGA FAATINO: Saili mai upu nei i totonu o le paso

Faatutu: tenari, Filipino, tutumu.

Faalava : Karite, areto, tofotofo.

T	E	S	T	A	U	O	P	I	T
U	A	S	N	K	A	R	I	T	E
T	O	F	O	T	O	O	M	A	N
U	A	I	S	F	O	P	E	M	R
M	S	L	P	A	F	P	O	K	I
U	U	I	O	P	R	P	L	K	P
P	S	P	A	E	S	A	S	K	O
P	A	O	S	A	R	E	T	O	U

PESE: O MAFATIAGA

O Mafatiaga e ave uma ia Iesu

Aua o ia e alofa ia te au x2
 Luga luga luga luga luga luga luga luga
 Sii Iesu i luga
 Lalo lalo lalo lalo lalo lalo lalo lalo
 Tulei Satani i lalo

AOAOGA:

1. E tutupu vavega i lo tatou ola pe a talitonu ma le faatuatua
2. Aua tatou te popole i le 'ai
3. E faasoa mai e le Atua meaai i lea aso ma lea aso.

ASO SA : 25 Oketopa 2020

MATAUPU : UA FAAOLAINA E IESU LE TAGATA OTI

SINI : Ia aoaoina le fanau ia malamalama o le mana fai vavega o Iesu e na te mafai ai ona faaola le tagata ua oti.

TUSI FAITAU: Luka 7:11-17

FESOASOANI MO FAIAOGA:

O lo o faagasolo pea le galuega a Iesu o le faamalolo o e mama'i ma talai le finagalo o lona Tamā. Tamaiti! O le tatou tala la i lenei taeao – o le tala i le tagata oti sa toe faaolaina e Iesu. Faimai le tala – ua oo atu Iesu ma ona soo i le nuu lea o Naina le igoa. E taunu atu o lo o tumu mai i tagata e toatele.

Ina ua latalata atu i latou i le faitoto'a o le aai, faauta foi ua omai tagata o lo o fata mai le tagata oti. O lenei tagata oti tamaiti fai mai na'o le pau lava lea o le tama a le fafine, ao le fafine foi ua oti lona toalua. Ua iloa atu e Iesu lenei tagata oti o lo o fata mai, ma lona tina o lo o tagi ona mutimutivale ai lea o lona alofa ia te ia. Ua alu atu o ia ma faiatu i le tina e aua le tagi. Ona pai atu lea o ia i le fata ma tuutuu ifo ia te ia ma faapea atu *“Le Taulealea e, ou te fai atu ia te oe, Ina tulai ia..”*Ioe Tamaiti – faimai na ona uma lava ona fai atu o upu ia a Iesu, ona nofo ai lea i luga o le tagata na oti, ua tautala o ia, ona ia tuuina atu lea o ia i lona Tina.

Na iloa e le motu o tagata lenei vavega na faia e Iesu, ona latou matata'u ai lea ma ua latou vivii ma faapea ane – *“Ua tu mai i ai tatou le perofeta sili, i le ma lea, Ua asiasi mai le Atua i lona nuu”*. Ua soo uma Iutaia atoa ona o'o ai lenei tala i le vavega na faia e Iesu.

Ia o le tatou tala lena tamaiti. O se aoaoga lelei mo tatou – Ia tatou talitonu ma faatuatua faamaoni e faia e Iesu vavega i lo tatou ola. O a ma'i ma faigata o le ola e oo mai ia tatou –ia tatou faatuatua pea ma talitonu i le mana faamalolo o lo tatou Alii Faaola o Iesu Keriso. O le loto mafatia o le tina lenei ona olana tama e toatasi ua oti, na faia e Iesu le vavega ma toe maua ai lagona mafanafana o lenei tina ina ua toe mafuta ma lana tama e toatasi. Ia manuia tele outou le fanau.

Uiga o Upu:

Mutimuti alofa : o le alofa ua sili

GALUEGA FAATINO: Ta'u mai nisi tagata o le Tusi Paia na faaolaina mai e Iesu i le oti

1. Lasalo
2. Afafine o Iairo

PESE: O MAFATIAGA

O Mafatiaga e ave uma ia Iesu

Aua o ia e alofa ia te au x2

Luga luga luga luga luga luga luga luga

Sii Iesu i luga

Lalo lalo lalo lalo lalo lalo lalo

Tulei Satani i lalo

AOAOGA:

1. E faia e Iesu vavega i lo tatou ola
2. E alofa Iesu i tagata uma
3. Talitonu ma faatuatua faamaoni ile mana o Keriso

MANATU TAIALA O NOVEMA : FAAMOEMOE I LE ATUA.

O le manatu Taiala lea ua mafai ona 'auau i ai lenei masina. Ua leai lava se isi malosi ese e tatau ona tatou faamoemoe pe faalagolago i ai. Ua na o le malosi lava mai le Atua, aua o ia o le pogai

o lo tatou ola ma lo tatou malosi. Faapena foi i ai tatou le fanau i lo tatou feagai ai ma le ola aoaoinai le potou salalau – faamoemoe i le Atua a tatou taumafaiga uma e iu ai i le manuia.

ASO SA : 1 Novema 2020

MATAUPU: O LE MITI A IAKOPO

SINI: Ia aoaoina le fanau ia malamalama, e tausia i tatou e le Atua i ana meaalofa eseese.

TUSI FAITAU : Kenese 28: 10-22

FESOASOANI MO FAIAOGA:

Talofa Tamaiti? Ina ua tuua e Iakopo o Peresepa ae alu i Karana poo Patanarama. O se nuu e mamao, ua alu le malaga a Iakopo ua lagona le vaivai ma ua fia malolo ona ua oo mai le pogisa. Ona taoto lea o ia ua moe ai, na alu atu foi o ia ma ni maa e faaaoga e aluga ai pe a malolo. Ina ua gase le moe a Iakopo, fai mai sa fai lana miti.

O lana miti sa fai, o le apefai ua faatuina i le eleele ua oo lona i'u po o le tumutumu o le apefai i le lagi. Faauta foi, o agelu a le Atua ua a'ea'e ma ifoifo ai. Faauta foi, ua tu le Alii i ona luga ua fetalai mai. *“O a'u o le Alii le Atua o Aperamo lou tama, ma le Atua o Isaako, o le fanua e te taoto ai ou te avatu ai ia te oe ma au fanau, e aveva foi au fanau pei o le efuefu o le eleele, e faasalalauina foi oe i sisifo ma sasa'e, ma le itu i matu, ma le itu i toga. O oe foi ma au fanau e manuia ai aiga uma o le lalolagi. Faauta foi ou te i ai ia te oe, ou te tausii foi ia te oe i mea uma e te alu i ai, ou te toe faafoisia mai oe i le nuu nei, aua ou te le tuua oe, seia ou faia le mea ua ou fai atu ai ia te oe.”*

Ona ala lea o Iakopo i le taeao ona faapea lea – *“E moni lava e i ai le Atua mea nei, ae ou te le iloa.”* Ua fefe ai o ia, ua faapea. *“O le mea matautia lava lenei, e le se mea ese lenei, na o le fale lava o le Atua, o le faitotoa lava lenei o le lagi”*. Ua tulai Iakopo i le taeao ua ia tago i le maa na ia aluga ai ua faatuina ma faailoga, ua ia liligi ifo i ona luga le suauu. Ua ia faaigoa i lea mea o Peteli – o lona uiga o le fale o le Atua. Ao le igoa muamua o lea eleele o Lusa.

Ona faia lea e Iakopo lana tauto ua faapea atu. *“Afai e ia te au le Atua, ma tausii ia te au i lenei ala ou te alu ai. Ma foai mai meaai ou te 'ai ai, ma ofu ou te ofu ai ina ia ou toe foi mai ma le manuia i le aiga o lo'u tama, ona fai ai lea o le Alii mo'u Atua”*.. Ioe tamaiti o le tautoga lea a Iakopo na faia i luma o le Atua.

Ao se aoaoga foi lea mo tatou – O le miti a Iakopo na faailoa ai ia Iakopo, le i ai faatasi o le Atua ma Ia. E faapena lo tatou va ma le Atua, e le tuulafoaina i tatou e le Atua. O lo o auai mai i mea uma tatou te faia. Ia tatou manatu ona faafetaia o ia i lana tausiga e ala i le tatalo.

Uiga o Upu:

Faasalalauina: taape solo

GALUEGA FAATINO: Taliga Fesili

1. O fea le nuu na alu i ai Iakopo? (Karana/Patanarama)
2. O ai le igoa na faaigoa ai e Iakopo le nofoaga sa fai ai lana miti?(Peteli)
3. O le a le uiga o lea igoa?(Fale o le Atua)
4. O ai le igoa muamua o lea oga eleele? (Lusa)
5. Toe faamatala le miti a Iakopo?(*tatala le avanoa i tamaiti*)

PESE:**GOD IS ALIVE**

God's not dead, NO,

He is alive x3

I feel Him all over me

E leo maliu le Atua..IOE

O lo o soifua pea x 3

Ou te lagonaina pea

I can feel Him in my hands

I can feel Him in my feet

I can feel Him in the Church

I can feel Him in the Street

I can feel Him in the Air

I can feel Him everywhere

I feel Him all over me.

Ou te lagona i ou lima

Ou te lagona i ou vae

Ou te lagona i le lotu

Ou te lagona i le malae

Ou te lagona i le ea

Ou te lagona i so o se mea

Ou te lagonaina pea...

AOAOGA:

1. E tausia i tatou e le Atua
2. E i ai le Atua i soo se mea.
3. Tatou maua le loto faafetai i meaalofa ua aumaia.

ASO SA :

8 Novema 2020

MATAUPU : UA PUPUNI E LE ATUA GUTU O LEONA

SINI :` Ia malamalama le fanau o le mana o le Atua o Tanielu na faasaoina o ia mai gutu o leona feai.

TUSI FAITAU: Tanielu 6:16 - 24

FESOASOANI MO FAIAOGA:

Talofa Tamaiti? O le tatou mataupu o lenei taeao o le Tala ia Tanielu. Ua molia e alii sili Tanielu i le tupu fai mai ua soli e Tanielu le tulafono e faasā ai ona tapuai se isi i se isi lava Atua sei vagana lava atua o Papelonia. Sa alofa Tariu ia Tanielu ona o lana uo, peitai sa le mafai lava le manao o alii sili ina ia lafo Tanielu i le lua o leona. Ua latou taitaiina atu Tanielu ma ua lafo i le lua o leona. Ua fai atu le tupu ia Tanielu – “ *O lou Atua o le ua e auauna i ai e le aunoa, o ia na te laveaiina oe..*”

Ua alu atu le tupu i lona fale ua le taumafa ona ua alofa i si ana uo o Tanielu. Ua le maua sana moe i le po, ua le fia faalogo foi i ni laaupese. Ua oo i le vaveao ona faataalise atu lea o le tupu i le lua o leona. Ua oo o ia i le lua ona alaga atu lea o ia ma le leo faamamai (tau le lagona) ia Tanielu – “*Tanielu e, le auauna a le Atua soifua ua mafai ea e lou Atua, o le ua e auauna i ai e le aunoaona laveai ia te oe ai leona?* Ua faateia le tupu ile tali mai o Tanielu – “*Le Tupu e, ia soifua oe e faavavau, ua auina mai e lo’u Atua o lana agelu, ua punitia ai gutu o leona, ua le afaina ai a’u, aua ua silafia e ia ua leai sa’u amio i ona luma, e leai foi se mea leaga ua a’u faia i ou luma le tupu...*”

Ua tupu le fiafia o Tariu ona ua faasaoina lana uo o Tanielu, ua ia fai atu ia aveina ae Tanielu ai le lua. Ona aveina ae ai lea o Tanielu mai le lua, ua leai lava se mea e tasi o lona tino o afaina i leona, aua ua ia faatuatua ma le loto atoa i lona Atua. Ua fai atu le Tupu ia taitaina mai tagata o e na molia mai Tanielu, ma ua lafo ia te i latou i le lua o leona atoa ma a latou ava ma a latou fanau.

O le tatou tala lenei tamaiti – Ioe ua pupuni e le mana o le Atua gutu o leona, lea na mafua ai ona faasaoina Tanielu mai leona feai a Papelonia. O se aoga mo tatou le fanau – o a mea faigata tatou te fesagai i le ola nei, ia tumau lo tatou faatuatua faamaoni i lo tatou Atua. E faasaoina i tatou e le Atua mai mea faigata o le ola, pe tatou faamaoni i le Atua. E iloa lo tatou faatuatua tamaiti ina ua tatou usiusitai i matua, toaga e fai meaaoga, ma toaga i le Aoga Aso Sa ma le lotu...Ia manuia tele outou le fanau.

Uiga o Upu:

Faamamai: leo tau le lagona (vaivai)
Lamupalaina: lamumalūina..

GALUEGA FAATINO: Faatino le Tala

PESE: **TANIELU, TANIELU (tune: I love you, you love me...)**

Tanielu e, Tanielu e,
Na lafo i le lua o Leona
Ua laveaina e le Atua
Ona o lona faatuatua

AOAOGA:

1. E leai se mea e faigata i le Atua.
2. Ia tumau lo tatou faatuatua faamaoni
3. E faia e le Atua vavega i lo tatou ola.

ASO SA : 15 Novema 2020

MATAUPU : UA FAAMALŌLŌ LE AFAFINE O IAIRO

SINI : Ia aoaoina le fanau ia malamalama e tali Iesu i o tatou faafitauli.

TUSI FAITAU: Mareko 5:21- 24, 35 – 43.

FESOASOANI MO FAIAOGA:

Faatalofa atu ia te outou le fanau i lenei taeao fou. Faimai ina ua toe foi atu Iesu i le vaa i le tasi itu o le vaitafe. Ona potopoto mai ai lea o le motu o tagata e toatele ia te ia e latalata ane i le vai. Ona sau ai lea o tasi tagata o le pule o le sunako, o Iairo le igoa o le tamaloa. Ua iloa e Iario Iesu ona sau ai lea o ia ua faapau i ona vae ma ua matua aioi atu ia te ia. *“O le a oti nei lava si ou afafine, ina e maliu atu ma ia e faaee ou aao i luga ia te ia e malolo ai, ona ola ai lea o ia..”*Ioe tamaiti, ona o atu ai lea o Iesu ma Iairo ma nisi o ona soo i le fale o Iairo.

Ua omai nisi mai le fale o Iairo, ua faapea atu – “*Ua oti lava lou afafine, se a le mea e te faalavelave ai pea i le a’oa’o(Iesu)?*”. Ua faalogo ai Iesu i upu a nei tagata, ona ia fai atu lea ia Iairo e aua le mata’u, tau lava o lona faatuatua atu ia te ia. Ua o atu pea Iesu ma nisi o ona soo i le fale o Iairo, ua latalata i latou ona iloa ai lea ei latou o le lauaitu, ma e o taufaitagi ma e o taufaiiaue tele. Ua ulufale i latou i totonu o le fale ona faiatu ai lea o Iesu – “*Se a le mea ua outou pisao ai ma outou fetagisi ai? E le o oti le teine ua na ona moe...*” Ona ia tulia uma lea o nei tagata i fafo, ona o lea o ia ma le tamā o le teine, ma lona tina atoa ma ona soo i totonu i le nofoaga o lo o taoto ai le teine. Ona tago ifo lea o Iesu i le lima o le teine maa faapea atu – “*Talita Kumi,*” o lona uiga pe a faamatalaina – “*Funa e ou te faiatu ia te oe, ia e tulai*”

Ioe Tamaiti, faimai na ona uma atu lava o upu ia a Iesu, ona tulai loa lea o le teime ma ua savali auā ua sefulu ma le lua o ona tausaga. Ona ofo tele ai lea o nei tagata i le vavega na faia e Iesu i le afafine o Iairo.

O le tatou tala lena tamaiti. O se aoaoga mo tatou le fanau, ia tatou faalagolago i le mana faaola o lo tatou Alii o Iesu Keriso. Ia tumau foi lo tatou faatuatua faamaoni e pei o le tamaloa lenei o Iairo na ia saili ai ma le mautinoa ia Iesu, e mautinoa e tali mai i ona puapuaga e ala i lona afafine. Ia manuia tele outou le fanau...

Uiga o Upu:

Lauaitu:	fetagisi (faanoanoaga)
Sunako:	falesa
Fetaomi:	tumutumu tagata

GALUEGA FAATINO: TALIGA FESILI

1. O le a le galuega a le tamaloa lenei o Iairo?
2. O a upu a Iairo na aioi atu ai ia Iesu mo lona afafine?
3. O le a le uiga o le upu *Talita Kumi*?
4. O le a le matua o le afafine o Iairo?

PESE: O MAFATIAGA

O Mafatiaga e ave uma ia Iesu
 Aua o ia e alofa ia te au x2
 Luga luga luga luga luga luga luga luga
 Sii Iesu i luga
 Lalo lalo lalo lalo lalo lalo lalo lalo
 Tulei Satani i lalo

AOAOGA:

1. E ofoofogia le mana o le Atua
2. Tumau lo tatou faatuatua faamaoni.
3. E foai mai e le Atua le ola fou.

ASO SA : 22 Novema 2020

MATAUPU : IOANE MA PETERU I LUMA O ALII SILI

SINI : Ia aoaoina le fanau ia malamalama, e le'i fefefe Ioane ma Peteru e tautatala i le mea moni i luma o le faamasinoga.

TUSI FAITAU : Galuega 4: 5 – 14

FESOASOANI MO FAIAOGA:

Ua oo i le taeao ona potopoto ai lea i Ierusalem o alii ma le au toeaina ma le au tusiupu, ma Ana le ositaulaga sili, Kaiafa, ma Ioane ma Alesana atoa uma lava ma le aiga o le au ositaulaga sili. Ona tatala mai ai lea o Peteru ma Ioane sa i le falepuipui, ona tuu lea i le ogatotonu mo le faamasinoina.

Ua latou fesili ia i la'ua poo le a le mana ao le igoa foi o ai ua la faia ai nei vavega i le faamalolo o tagata mama'i. E le'i fefefe lava i la'ua i le oti, aua ua la loto tetele e tautino le mea moni i ai latou. Fai mai le tali a Peteru – *“O outou o alii sili o le nuu ma toeiina o Isaraelu, afai e faamasinoina i maua i lenei aso i le alofa ua faia i le tagata ma'i, po o le a ua malolo ai o ia..”* Ua manatu Peteru ma Ioane e leo so la malosi ua la faia ai nei vavega. O le suafa o Iesu Keriso le Nasareta , o Le sa latou faastauroina ma toe faatuina e le Atua nai e ua oti. O Ia lava na afua ai ona faia nei faamalologa.

E le'i avea le tau faafefe o alii sili o le nuu, ma ala e vaivai ai le faatuatua o Peteru ma Ioane i le Agaga o le Keriso toetu ua mafai ai ona la faia vavega ma faamalolo tagata mamai. Ua vaai i latou i le loto tele o Peteru ma Ioane, a ua latou iloa foi o Peteru ma Ioane e le o ni tagata sa aoaoina lelei. Ae ua tulagaese lo la iloa ona o e sa **mulimuli ia Iesu.**

Ioe Tamaiti! O uiga ia faa-Iesu, e le fefe e tautala i le mea moni. E na te le faia foi se mea pepelo. O se aoaoga foi lena mo tatou. Aua le avea le malosi mai o le fili ma ala tatou te pepelo ai. Ia tatou iloa ona tautatala i mea moni. O le isi lea uiga taatele ia tatou, o le ola pepelo. A ia tatou tautino le mea moni. E fesoasoani mai lava le Agaga o le Atua ia i tatou.

Uiga o Upu:

Aupitoaluga: pito i luga

GALUEGA FAATINO: Fesili tuliloa..

1. Aisea ua molia ai Peteru ma Ioane?
2. O le a le auupega na mafai ai e Peteru ma Ioane ona faia vavega?
3. O fea le aoga sa aoaoina ai Peteru ma Ioane?

(NB: O nai fesili tuliloa ia e mafai ai ona faatalanoa ai le fanau, ona toe faalautele lea e lau Susuga)

PESE: E LEAI SE MEA E FAIGATA I LE ATUA

E leai se mea e le mafai
 Pe a faatuatua i le Atua
 E leai se mea e le mafai
 Pe a faatuatua i lana Upu
 Faalogo ia ao fetalai
 E iai se mea e faigata
 Ia faatuatua i le Atua
 Ma lana Upu Paia
 Aua o mea, soo se mea
 Ioe, e mafaia mea uma e le Atua.

Nothing is impossible when you put your trust in God
 Nothing is impossible when you're trusting in His word
 Hearken to the voice of God to thee
 Is there anything too hard for me??
 Then put your trust in God alone and rest upon His Word
 For everything, Oh everything
 Yes, everything is possible with God.

AOAOGA:

1. Ia maua lo tatou loto tetele e faatino a tatou feau
2. Aua le ola pepelo
3. E fesoasoani mai le Agaga o le Atua.

ASO SA: 29 Novema 2020

MATAUPU : UA FASIOTIA HAMANU

SINI : Ia malamalama le fanau, e faamasinoina i tatou i a tatou amio e fai.

TUSI FAITAU : Eseta 7:1-10

FESOASOANI MO FAIAOGA:

O Hamanu sa avea ma Alii sili i le malo ole tupu o Asueru. Ua oo i le aso lona lua o le taumafataga sa tapenaina e Eseta. Ona o atu ai lea o le Tupu ma Hamanu ua aai faatasi male masiofo ia Eseta. Ona fai atu ai lea o le Tupu ia Eseta – *“Le Masiofo e, Eseta, se a le mea e te ole mai ai? E avatua lava ia te oe, e oo lava i le vaeluaina o le malo e faia lava.”* Ona tali atu ai lea o Eseta i le tupu ina ia alofa mai i lona nuu, ina ia aua nei fasiotia. Ua faia e Hamanu se fuafuga ina ia fasiotia ai tagata Sa Iuta, peitai e le iloa e le Tupu.

Ona fesili lea o Asueru i le Masiofo – *“Poo ai lena? Po o fea o iai le ua manatu i lona loto ina ia faia faapea? Ua tali atu Eseta “O le tagata ua ita mai ma faasaua mai, o lena tagata amio leaga o Hamanu.”* Ua tupu tele le ita i le loto o Asueru ona o Hamanu ma lana taupulepulega leaga i le nuu o Iuta. Sa taumafai Hamanu e toe faatoese ia Eseta ona o lana tonu sa fai, ae lei mafai ai ona talia e Eseta. Ua iloa e Hamanu e oo lava le oti ia te ia. Ua faatonuina e le Tupu se tasi o ana Eunuka o Harepono le igoa. Ina faatautauina Hamanu i le laau sa ia faia e fasioti ai Moretekai. Ona latou faatautau ai lea ia Hamanu, ona te’a ai lea o le ita o le Tupu.

Ia o le tala lena Tamaiti. O se aoaoga mo tatou le fanau, aua tatou te faufau leaga i isi o tatou uso a tagata. Ia pe aua foi e te taulamalama i isi tagata. A ia tatou maua le galulue faatasi ma felagolagomai. Aua e toe iu mai i ai tatou ni fuafuaga leaga tatou te faia. Ia manuia tele outou le fanau.

Uiga o Upu:

Masiofo: o le upu lea e ta’u ai le toalua o le Tupu.

Faatoga: aioi,

GALUEGA FAATINO: PASO

Saili mai upu nei i totonu o le paso?

Asueru, Eseta, Hamanu, Moretekai

H	O	P	S	T	N	M	L	M	A
A	E	T	R	U	O	P	A	S	S

M	M	O	P	F	G	S	A	H	U
A	E	T	U	O	I	P	E	S	E
N	S	V	N	M	K	L	S	A	R
U	A	U	O	P	T	H	E	V	U
U	S	F	G	O	P	L	T	N	M
M	O	R	E	T	E	K	A	I	N

PESE: WORK TOGETHER

When we all work together, together, together
When we all work together, how happy we'll be

For your work is my work
And my work is God's work
When we all work together
How happy we'll be

Afai tatou te galulue faatasi, faatasi, faatasi
Afai tatou te galulue faatasi ona fiafia ai lea

O la'u galuega , o lau galuega
Tatou galulue mo le Atua
Afai tatou te galulue faatasi
Ona fiafia ai lea

AOAOGA:

1. Aua le ola taulamalama.
2. Ia maua le galulue faatasi.
3. E le lelei le faufau leaga i le isi tagata.

MANATU TAIALA O TESEMA: UA OO MAI LE FAAOLATAGA

O le masina lenei e tatou te faamanatuina ai le fanau mai o le Alii Faaola o Iesu Keriso. O le uiga foi lea o le upu Osana – Ia faaola mai. O le masina ua faaupuina o aso fiafia. Ia tatau ai foi ona faataua ai i fanau le fanau mai o Iesu. O le Atua ua liutino tagata e mau faatasi ma i tatou.

ASO SA: 6 Tesema 2020

MATAUPU: VALOAGA MO LE MESIA

SINI: Ia aoaoina le fanau ia malamalama – o le fanau ma le afio mai o Iesu i le lalolagi ua leva ona valoia mai e perofeta o le feagaiga tuai.

TUSI FAITAU : Isaia 9:6-7

FESOASOANI MO FAIAOGA:

O Isaia o le Perofeta sa ia valoia le afio mai o le Mesia. O le i ai o Isaraelu i le tafeaga o se ola sa saisaitia ma pologa. O se olaga sa puleesea ma tigaina i aso uma. Ao le faamalosi atu lea a le perofeta i le nuu o le Atua. E i ai le taimi e oo mai ai lo latou faaolataga. O upu a Isaia o lo o faamalosia ai le saisaitia o Isaraelu. Peita’i o lo o valoia ai le afio mai o le Mesia.

Fai mai upu sa faitauina – *“Auā ua fanau mai mo i tatou le tama,, ua foaiina mai mo i tatou le atalii, e i lona ua le malo, e igoa foi o ia i le silisili ese, o le Faipule, o le Atua malosi, o le Tama o le faavavau, ma le Alii o le filemu...”* O upu ia a Isaia o lo o manino mai ai le fetau tonu ina ua fanau mai le Alii Faaola o Iesu Keriso i le Feagaiga Fou. E tulagaese le afio mai o Iesu Keriso i manatu o le Perofeta o Isaia.

O le afio mai o Iesu Keriso o le faamoemoe ua leva ona valoia mai e Perofeta. O le afio mai o le Mesia e faaola le lalolagi agasala. Na maliu ma toetu manumalo ina ia magalo tagata uma ma tatou maua le ola e faavavau. Ia ua tatou aga atu i le Kerisimasi e faamanatu ai le fanau mai o le Alii o le filemu. Tatou tapena po o le a sa tatou meaalofa e ave mo Ia. A tatou maua ni meaalofa e pei o le faalogo ma usitai, ma isi mea lelei tatou te faia. O se meaalofa lelei tele lea..Ia manuia tele outou le fanau.

Uiga o Upu:

Maelegā: potu

GALUEGA FAATINO: Tusi mai sau solo e faatatau i le faaolataga na faia e Keriso, lua fuaiupu taifa laina.

PESE: HE IS LORD

He is Lord (x2)

He has risen from the dead

He is Lord

Every knee shall bow

Every tongue confess

That Jesus Christ is Lord

O Ia o le Alii (x2)

Ua toetu mai le oti

O Ia o le Alii

Tootuli uma i ai tulivae

Ta'uta'u atu i laulaufaiva

O Iesu Keriso le Alii

AOAOGA:

1. O Iesu Keriso le faaola
2. Ave sa tatou meaalofa lelei
3. Talia Iesu i totonu o tatou aiga

ASO SA : 13 Tesema 2020

MATAUPU : IOSEFA MA LE AGELU

SINI : Ia malamalama le fanau ua faaali le Agelu ia Iosefa e faailoa ai le fanau mai o le Faaola.

TUSI FAITAU: Mataio 1:20 - 23

FESOASOANI MO FAIAOGA:

Talofa Tamaiti ? Ua iloa e Iosefa ua to Maria mai le Agaga Paia, ona nofonofo ai lea o Iosefa ma mafaufau i le mafuaaga o nei mea. Peitai sa faaali ai le agelu ia Iosefa i le miti ua faapea atu – *“Iosefa e le atalii o Tavita, aua e te fefe ina au mai ia te oe o Maria lau ava, aua o lana to e mai le Agaga Paia lea,”* *“O le a fanau mai ia te ia se tama tane, e te faaigoa foi o ia ia Iesu, aua e*

faaola e ia lona nuu i a latou agasala..”O lea ua taunu’u ai valoaga sa valoia mai e Perofeta o le feagaiga tuai.” Faauta e to le taupou, ma fanau mai le tama tane, latou te faaigoa foi ia te ia o Emanuelu”O lona uiga pe a faamatalaina ua ia tei tatou le Atua. O lona uiga o lea ua tatou mafuta ma le Atua sa le mafai ona tatou vaai i ai.

O Iosefa sa le mautonu lona mafaufau ina ua to Maria, peitai na faaali loa i ai le agelu e ala i le miti, ona lagona ai lea e Iosefa lona fiafia, aua ua ala mai lona toalua o Maria le tama o le Faaolataga. O le talitonu o Iosefa i le faaliga na tausii ai ma le loto atoa e Iosefa o Maria ao feagai ma le maitaga poo le to.

E manatu o lea ua tatou aga atu i vaitau o le faamanatuina o le fanau mai o le pepe o le Kerisimasi. Ao se feau taua foi lea ua aoao mai e le mataupu o lenei Aso Sa. E ala eseese ala e faaali mai ai le Atua i ai tatou le fanau. Avea i tatou e fai ma faaola i totonu o tatou aiga. O lau amio ia lelei o le mea taua lea e tauleleia ai o tatou aiga, nuu ma le Ekalesia.

GALUEGA FAATINO: Tusi mai sau solo e faatatau i le fanau mai o Iesu Keriso. Ia tolu fuaiupu tai 4 laina i le fuaiupu....(*Taua le toe faamalamalama e Lau Susuga fuaiupu ma laina o le tusiga o solo*)

PESE: Vivii lo’u loto i le Alii.....

AOAOGA:

1. Avea i tatou ma faaola i totonu o tatou aiga.
2. E faaali mai le Atua i ai tatou.
3. O Iesu le faaola mo tagata uma.
